

法華會義

九之十

C40
4514
(10)

C 40-45-14

了翁上座請大猷及有
家書置之武州紫雲山
我徵英塔院庑府中永
為學者不敢許出院內
富山二世鐵牛機謹誌



B 64853

妙法蓮華經台宗會義卷四之一

古吳後學滿益智旭述

釋化城喻品竟次釋五百弟子愛記品

五百弟子受記品第八

此品具記千二百而但標五百者五百得記名同

五百口陳領解故也

因緣說周中二授下根記二初此品授千二百

記二學無學品授二千人記 庚初中二初授

滿慈子二授千二百人 辛初又二初序默領

解。二如來述記。 (壬) 初又二。初敘其得解歡喜。

二敘其默念領解。 (癸) 今初

爾時富樓那彌多羅尼子。從佛聞是智慧方便隨宜說法。又聞授諸大弟子阿耨多羅三藐三菩提記。復聞宿世因緣之事。復聞諸佛有自在神通之力。得未曾有。心淨踊躍。卽從座起。到於佛前。頭面禮足。卻任一面。瞻仰尊顏。自不暫捨。

先敘得解之由有四。一者聞法譬二周開三顯一。智慧是領二處顯實。方便隨宜。是領二處開權也。

二者聞授舍利弗等五人記。諸大弟子。卽領開權授菩提記。卽領顯實也。三者復聞宿世因緣。先教無上道。今還說法華。是顯實。常與師俱生。漸教以佛道是開權也。四者復聞大自在神通力。觀彼久遠。猶若今日。權立化城。如彼導師。亦各具權實二義也。次叙內解歡喜。得未曾有者。從昔未聞開顯。而今始得聞也。心淨者。除涅槃愛破無明惑也。踊躍者。開佛知見。大樂歡喜也。後敘外形恭敬。如文。若約本迹。則是慶諸實行耳。觀心。如前說。

法華會義
二 二敘其默念領解

而作是念。世尊甚奇特所爲希有。隨順世間若干種性。以方便知見而爲說法。拔出衆生處處貪著。我等於佛功德言不能宣。唯佛世尊能知我等深心本願。文有二意。初明默念領解。次唯佛世尊下明默求發迹請記。問前二周得悟皆發言領解。此何默念答。前爲下根未悟事須彰言勸動。今下根已悟無所勸動。故默念也。世又上來但領解不求發迹言則不嫌。今亦解亦發亦解故念。避物譏嫌故默。

念允宜也。對又默念領解是大領解。如淨名默然

是真入不二法門也。爲又權實不可思議非言非

念而言而念。非言而言故前來口陳領解非念而

念故今則默念領解也。第一問前來何意不求發

迹。義答爲下根未悟故。今下根已解權化事足。若下

根發迹則知中上亦權若約上中先發。則于下根

不便也。世尊甚奇特所爲希有。領實智也。隨順世

間若干種性而爲說法領權智也。此領方便中開

顯意也。拔出衆生處處貪著。領火宅中開顯意也。

法苑珠林卷第...
我等於佛功德言不能宣。領藥草中如來復有無量功德等也。求發迹中言我等者。通念請發諸人迹也。深心者。三世助佛宣化之本懷也。本願者。本求無上大菩提也。從深心故。須發迹。從本願故。須授記。初敘默領解竟。

⑤二如來述記。二初長文。二偈頌。⑥初中二。初

述本迹。二與授記。⑦初又三。初就釋迦世行

因發迹。二約過去世顯其本行。三約三世佛所

修因。⑧今初

爾時佛告諸比丘。汝等見是富樓那彌多羅尼子不。我常稱其於說法人中最爲第一。亦常歎其種種功德。精勤護持助宣我法。能於四衆示教利喜。具足解釋佛之正法。而大饒益同梵行者。自捨如來。無能盡其言論之辯。

標言汝等見不者有二意。一見其迹爲小不。二見其本功德不。衆人但見迹爲聲聞而不能知。本是菩薩故云見不也。我常稱其下是標其迹。迹於說法人中最爲第一。若非法身妙本。無以垂於第一。

勝迹。此舉迹以顯本也。亦常歎其下。是標其本。本地福慧萬行莊嚴。故云種種。本地既有種種功德。何但迹爲二乘。此舉本以明迹也。精勤護持下。是釋本迹。助宣我法。卽是迹中助宣半滿之法也。迹在三藏。悟四真諦。是護持助宣略法。迹在方等。示受彈訶。是護持助宣生酥法。迹領般若。轉教菩薩。是護持助宣熟酥法。迹在法華。三周得悟。是護持助宣醍醐法。具足權實功德。而迹起五味。助佛調熟實行衆生。故云亦常歎其種種功德也。能于四

衆示教利喜。是述其迹中助宣半字法門。具足解釋佛之正法。是述其迹中助宣滿字法門。而大饒益同梵行者。是助佛饒益半滿弟子。自捨如來者。謂降妙覺已下。皆無能知。此卽述其本地功德也。

丑 二約過去世顯其本行

汝等勿謂富樓那。但能護持助宣我法。亦於過去九十億諸佛所護持助宣佛之正法。於彼說法人中。亦最第一。又於諸佛所說空法。明了通達。得四無礙智。常能審諦清淨說法。無有疑惑。具足菩薩神通之力。

法華集疏
五
隨其壽命常修梵行。彼佛世人咸皆謂之實是聲聞。而富樓那以斯方便。饒益無量百千衆生。又化無量阿僧祇人。令立阿耨多羅三藐三菩提。爲淨佛土。故常作佛事。教化衆生。

顯本有二。一遠本。二近本。遠本冥逸。爲信良難。故略而不述。但舉九十億近本。有宿命智能。知近本。故舉近以證遠。就九十億文。具明助佛宣揚。權實之教。調伏衆生。護持助宣佛之正法。卽總明權實。皆正法也。又於空法明了。等卽別明助宣。爲實施

權。了知析空卽空。第一義空。建立差別。用擬阿含方等般若三昧也。彼佛世人咸皆謂之實是聲聞者。于時旣未發迹。但謂三藏實證。方等被訶般若。被加令說。不知是大菩薩也。又化無量。令立菩提。卽別明助宣開權顯實。同今法華醍醐味也。然于過去佛所。豈不亦助單半單滿等法。但由今佛出。五濁世宜引施開廢會等化。是故皆從同類以說。例如光照東方。文殊敘古。豈無餘途。引同類耳。又單半單滿。爲化不難。施開廢會。方盡如來應病與

藥之妙

⑤三約三世佛所修因

諸比丘富樓那亦於七佛說法人中而得第一。今於我所說法人中亦爲第一。於賢劫中當來諸佛說法人中亦復第一。而皆護持助宣佛法。亦於未來護持助宣無量無邊諸佛之法。教化饒益無量衆生。令立阿耨多羅三藐三菩提。爲淨佛土。故常勤精進教化衆生。

亦例前助宣半滿五味利益大小也。初述本迹竟。

⑥二與授記五。初明因圓果滿。二明國土廣淨。三明劫國名字。四明佛壽法住。五明滅後供養舍利。⑦今初

漸漸具足菩薩之道。迺無量阿僧祇劫。當於此土得阿耨多羅三藐三菩提。號曰法明如來。應供。正徧知。明行足。善逝。世間解。無上士。調御丈夫。天人師。佛。世尊。

初一句牒前明因圓。過無量下。明果滿也。

⑧二明國土廣淨。又五。初明國大嚴淨。二明純是

善道三明人天福慧具足四明菩薩聲聞眾數甚多五總結莊嚴 寅今初

其佛以恒河沙等三千大千世界為一佛土七寶為地地平如掌無有山陵谿澗溝壑七寶臺觀充滿其中諸天宮殿近處虛空人天交接兩得相見

地平如掌者或云海底有石名掌此石無有一微塵許不平或云賢劫經正明如佛手掌非引人掌也

寅二明純是善道

無諸惡道亦無女人一切眾生皆以化生無有淫欲有女人而無惡道如阿閼佛國雖有女人而無女事也今惡道女人俱無則如阿彌陀國清淨最為

第一

寅三明人天福慧具足

得大神通身出光明飛行自在志念堅固精進智慧普皆金色三十二相而自莊嚴其國眾生常以二食一者法喜食二者禪悅食

聞法歡喜以資慧命名法喜食入禪適悅以持法

身名禪悅食。不須分段飲食也。

寅四明菩薩聲聞衆數甚多。

有無量阿僧祇千萬億那由他諸菩薩衆。得大神通。四無礙智。善能教化衆生之類。其聲聞衆。算數校計。所不能知。皆得具足六通三明及八解脫。

寅五總結莊嚴。

其佛國土。有如是等無量功德莊嚴成就。

二明國土廣淨竟。

丑三明劫國名字。

劫名寶明國名善淨。

丑四明佛壽法住。

其佛壽命無量阿僧祇劫。法住甚久。

丑五明滅後供養舍利。

佛滅度後起七寶塔徧滿其國。

二如來述記中長文竟。

癸二偈頌二。初頌發迹。二頌授記。

總發諸聲聞迹。二頌發富樓那迹。

爾時世尊欲重宣此義而說偈言。

丑今初

諸比丘諦聽佛子所行道。善學方便。故不可得思議。知衆樂小法。而畏於大智。是故諸菩薩作聲聞緣覺。以無數方便。化諸衆生。類自說是聲聞去佛道甚遠。度脫無量衆。皆悉得成就。雖小欲懈怠。漸當令作佛。內秘菩薩行。外現是聲聞。不欲厭生死。實自淨佛土。示衆有三毒。又現邪見相。我弟子如是方便度衆生。若我具足說種種化現事。衆生聞是者。心則懷疑惑。小欲謂志樂小乘。懈怠謂不求大乘也。示衆有三毒等者。非但示爲聲聞。亦作三毒。凡夫及邪見外。

道也。又如身子示瞋。難陀示貪。調達示癡等。

⑤二頌發富樓那述

今此富樓那。於昔千億佛。勤修所行道。宣護諸佛法。爲求無上慧。而於諸佛所。現居弟子上。多聞有智慧。所說無所畏。能令衆歡喜。未曾有疲倦。而以助佛事。已度大神通。具四無礙智。知諸根利鈍。常說清淨法。演暢如是義。教諸千億衆。令住大乘法。而自淨佛土。未來亦供養。無量無數佛。護助宣正法。亦自淨佛土。常以諸方便。說法無所畏。度不可計衆。成就一切智。

先五偈頌約過去顯本。後二偈頌約未來佛所行因。略不頌現佛及七佛也。初頌發迹竟。

①二頌授記三。初頌因圓果滿。二超頌國劫名字。

三頌國土廣淨。略不頌佛壽法住及滅後起塔也。②今初。

供養諸如來。護持法寶藏。其後得成佛號。名曰法明。

③二超頌國劫名字。

其國名善淨。七寶所合成。劫名爲寶明。

④三頌國土廣淨。

菩薩衆甚多。其數無量億。皆度大神通。威德力具足。充滿其國土。聲聞亦無數。三明八解脫。得四無礙智。以是等爲僧。其國諸衆生。淫欲皆已斷。純一變化生。具相莊嚴身。法喜禪悅食。更無餘食想。無有諸女人。亦無諸惡道。富樓那比丘功德悉成滿。當得斯淨土。賢聖衆甚多。如是無量事。我今但略說。

初授滿慈子記竟。

⑤二授千二百人記三。初念請。二與記。三領解。

⑥今初。

爾時千二百阿羅漢心自在者作是念我等歡喜得未曾有。若世尊各見授記如餘大弟子者不亦快乎。

⑤二與記二。初長文。二偈頌。⑥初中三。初總記

千二百。二別記。憍陳如。三別記五百。⑦今初

佛知此等心之所念。告摩訶迦葉。是千二百阿羅漢。我今當現前次第與授阿耨多羅三藐三菩提記。

⑧二別記。憍陳如

於此衆中。我大弟子憍陳如比丘當供養六萬二千億佛。然後得成爲佛。號曰普明如來。應供。正徧知。明

行足。善逝。世間解。無上士。調御丈夫。天人師。佛。世尊。陳如。最初得度爲僧上座。故別授記。

⑨三別記五百

其五百阿羅漢。優樓頻螺迦葉。伽耶迦葉。那提迦葉。迦留陀夷。優陀夷。阿菟樓陀。離婆多。劫賓那。薄拘羅。周陀。莎伽陀等。皆當得阿耨多羅三藐三菩提。盡同一號。名曰普明。

迦留陀夷。此云黑光。佛成道後。父王遣令請佛。佛命出家者也。據寶積經。則善來得道。以神通力轉

化父王據阿舍毘尼。則是六羣比丘之一。雖出家後。仍犯多過。年七十餘。方得調伏。證阿羅漢。勸化第一。所化夫婦。俱見諦者。足一千家。故知大小兩機。所見各別如此。何但佛之身密不可思議。卽諸大弟子身密亦皆不可思議也。優陀夷亦云。優波離亦云。鄔波離。梵音輕重耳。持律第一。周陀。此云大路。證阿羅漢。能持三藏。作大法師。卽是兄弟名。莎伽陀。此云小路。亦云繼道。卽是弟名。其兄授以一句伽陀。一百日中不能成誦。兄逐出房。佛親授以

我拂塵我除垢六字。猶復得前遺後得後遺前。教以調息。方證聖果。具大神力。降毒火龍。此四尊者。前列衆中。未有名字。故今釋出。又列衆中有憍梵波提。畢陵伽婆蹉。摩訶拘絺羅。難陀。孫陀羅。難陀。凡五人不見別授。或是梵文未來。或總攝在五百人及千二百人中。長文竟

○二偈頌二。初頌記陳如及五百。二頌總授一切

聲聞記 子今初

爾時世尊欲重宣此義而說偈言

僑陳如比丘當見無量佛。過阿僧祇劫。乃成等正覺。常放大光明。具足諸神通。名聞徧十方。一切之所敬。常說無上道。故號爲普明。其國土清淨。菩薩皆勇猛。咸升妙樓閣。遊諸十方國。以無上供具。奉獻於諸佛。作是供養已。心懷大歡喜。須臾還本國。有如是神力。佛壽六萬劫。正法任倍壽。像法復倍是。法滅天人憂。其五百比丘。次第當作佛。同號曰普明。轉次而授記。我滅度之後。某甲當作佛。其所化世間。亦如我今日。國土之嚴淨。及諸神通力。菩薩聲聞衆。正法及像法。

壽命劫多少。皆如上所說。

長文略偈頌廣。先領授陳如中。初二句明行因。次二偈明得果。次二偈半明國淨。次一句明佛壽。次二句明正像。次法滅天人憂。句結上起。下次三偈半。頌授五百記也。

②二頌總授一切聲聞記

迦葉汝已知五百自在者。餘諸聲聞衆。亦當復如是。其不在此會。汝當爲宣說。

餘諸聲聞指千二百人中。已授五百餘七百人。并

總指一切聲聞也。其不在此會者。無論在與不在。得記是同也。授千二百記中。二與記竟。

①三領解二初長文。二偈頌。②初中二。初經家

敘喜。二自陳領解。③今初

爾時五百阿羅漢於佛前得受記已。歡喜踊躍。卽從座起。到於佛前。頭而禮足。悔過自責。

歡喜踊躍是慶。今得解悔過。自責是愧。昔不解也。

④二自陳領解二初法說。二譬說。⑤今初

世尊。我等常作是念。自謂已得究竟滅度。今乃知之。

如無智者。所以者何。我等應得如來智慧。而便自以小智爲足。

自謂已得究竟滅度。是悔責昔迷。今乃知之。如無智者。是慶。今始悟。方知從前小智。竟同無智。亦自責根鈍。不能早悟也。所以者何。下釋成無智之意。今日乃知。應得如來大智。而向日便以小智爲足。封小失。太豈非竟同無智乎。

⑥二譬說二。初立譬。二法合。⑦初中二。初醉酒

譬。譬自謂滅度。小智爲足。二親友覺悟。譬譬今

乃知之應得如來智慧 卯初又二初繫珠譬
領上王子結緣。二醉卧不覺譬領上中間退大。

二起已遊行譬領上接之以小 辰今初

世尊譬如有人。至親友家。醉酒而卧。是時親友官事
當行。以無價寶珠繫其衣裏與之而去。

有人。即五百自譬也。親友譬昔日第十六王子也。
家譬大乘教為家也。醉酒而卧。譬無明從未醒也。

醉有二義。一重醉都不覺知。譬一句一偈結緣未
曾登品。二輕醉微覺尋忘亦名不覺。譬薄有聞慧。

在五品初未入似位也。官事當行譬王子餘處機
興逗緣往應也。弘法化他非是私務故云官事。無
價寶珠譬一乘實相真如智寶也。繫其衣裏者。衣
譬彼時慚愧忍辱及信樂心。由聞法時微生信樂
得成了因智願種子也。

辰二醉卧不覺譬

其人醉卧都不覺知

此譬無明心重尋復不憶。領中間懈退不受大法

辰三起已遊行譬

起已遊行到於他國。爲衣食故。勤力求索。甚大艱難。若少有所得。便以爲足。

起已遊行。譬善根欲發。厭苦求樂也。到於他國。譬無明覆解。不知還向大乘本國也。衣食譬正助二道也。求索艱難。譬未入正法時。空無證獲也。得少爲足。譬乘權教。修行得小乘果。正領中間以小接也。初醉酒譬竟。

○卯二親友覺悟。譬領上以是本因緣。今說法華經。等賜諸子白牛大車也。又亦爲三。初訶責。二示

珠。三勸寶。

○辰今初

於後親友會遇見之。而作是言。咄哉丈夫。何爲衣食乃至如是。

會遇見之。譬大乘機發也。咄哉訶責。譬動執生疑也。三周中皆有此意。法說中云。我令脫苦縛等。譬說中云。我先不言。皆爲三菩提耶。因緣中云。宿世因緣。我今當說。皆訶責之辭也。

○辰二示珠

我昔欲令汝得安樂。五欲自恣。於某年日月。以無價

寶珠繫汝衣裏。今故現在。而汝不知。勤苦憂惱以求自活。甚爲癡也。

安樂譬無上大涅槃也。五欲自恣譬大乘稱性真實受用。如所云實報勝妙五塵能令迦葉起舞者是也。某年日月譬大通佛覆講法華時也。今故現在。譬正顯實。法說中廣明五佛。譬說中等賜大車。因緣中還爲說大。皆示珠之義也。

辰三勸買

汝今可以此寶貿易。所須常可如意。無所乏短。

珠雖價直無量。仍須貿易。方有濟用。譬了因內解。雖復究竟。必以種易現。以昔一解一切解。而買一行一切行。珠體不竭。買亦無窮。故須更聽更修。方顯寶之功用。如華嚴中得摩尼珠。千種瑩治。方能雨寶。解行相稱。方堪佛記。從是以後。則具有寂滅。忍衣。首楞嚴食。自行化他。無量衆寶。無功用位。彼此不窮。故云常可如意。無所乏短也。法說中身子得記。譬說中四人得記。因緣中千二千得記。皆卽勸買之義。初立譬竟。

寅 二法合二。初合醉酒。二合覺悟。卯 初中三。初合繫珠。二合醉卧不知。三合起已遊行得少為足。辰 今初

佛亦如是。為菩薩時教化我等。令發一切智心

辰 二合醉卧不知

而尋廢忘。不知不覺

辰 三合起已遊行得少為足

既得阿羅漢道。謂滅度。資生艱難得少為足

由三界內資生艱難。故於小果自謂為足也。然無

大乘功德法財。則亦仍是資生艱難。初合醉酒。竟

卯 二合親友覺悟。譬三。初合訶責。二合示珠。三合

勸買。辰 今初

一切智願。猶在不失。今者世尊覺悟我等。作如是言。諸比丘。汝等所得非究竟滅

辰 二合示珠

我久令汝等種佛善根。以方便故。示涅槃相。而汝謂為實得滅度

辰 三合勸買

世尊。我今乃知實是菩薩得受阿耨多羅三藐三菩提記。以是因緣。甚大歡喜。得未曾有。

三領解中。初長文竟

癸 二偈頌二。初頌內心得解。二頌自陳領解

子

今初

爾時阿若憍陳如等。欲重宣此義而說偈言

我等聞無上安隱授記聲。歡喜未曾有。禮無量智佛。今於世尊前自悔諸過咎。

初一偈頌歡喜得解。次半偈頌悔過自責也

子 二頌自陳領解二。初頌法說。二頌譬說

初

於無量佛寶得少涅槃分。如無智愚人。便自以爲足

丑 二頌譬說二。初頌立譬。二頌法合

初頌醉酒譬。二頌親友覺悟譬

卯 今初

譬如貧窮人。往至親友家。其家甚大富。具設諸肴膳。以無價寶珠繫著內衣裏。默與而捨去。時卧不覺知。是人既已起。遊行詣他國。求衣食。自濟資生甚艱難。

得少便爲足。更不願好者。不覺內衣裏。有無價寶珠。初七句。頌繫珠譬。第八一句。頌醉卧不覺譬。後二偈。頌起已遊行譬也。凡夫未有修德。名貧窮人。諸佛菩薩與諸衆生同一心性。名爲親友。具足權實種種功德。名爲大富。諸方便教。名爲肴膳。一乘圓頓教理。名爲寶珠。慚愧忍辱。名爲外衣。信樂之心。名爲內衣。初結緣時。具足二衣。退大墮惡。則無外衣。若約現無信樂。乃似內衣亦無。而種子仍在。但
是衣弊。非全無也。餘如文。

卯二頌親友覺悟譬

與珠之親友。後見此貧人。苦切責之已。示以所繫珠。貧人見此珠。其心大歡喜。富有諸財物。五欲而自恣。初頌立譬竟。

寅二頌法合二。初頌合醉酒。二頌合覺悟。卯今初。

我等亦如是。世尊於長夜。常愍見教化。令種無上願。我等無智故。不覺亦不知。得少涅槃分。自足不求餘。初一偈。頌合繫珠。次半偈。頌合醉卧不知。後半偈。

頌合起已遊行得少爲足也

卯二頌合覺悟

今佛覺悟我言非實滅度得佛無上慧爾乃爲真滅。我今從佛聞授記莊嚴事。及轉次授決身心徧歡喜。初半偈頌合訶責。次半偈頌合示珠。後一偈頌合勸賀也。初授千二百記竟。

釋五百弟子受記品竟。次釋授學無學人記品。授學無學人記品第九。

研真斷惑慕求勝見名之爲學。卽三果四向真無

漏慧也。真窮惑盡勝見已極。無所復學名爲無學。

卽阿羅漢果也。

學無學別。卽世界研真。卽爲人。斷惑。卽對治真窮惑盡。卽第一義。

約教者。析法研真名學。惑盡真窮名無學。三藏意也。體法研真名學。無真無惑名無學。通意也。自淺之淡名學。通別惑盡權實理窮名無學。別意也。研如來藏有學無學。法性實相非學非無學。而學而無學。圓意也。是二千八或是學或是無學。同是一流。一時受記。同一名號。故別爲一品也。本迹者。阿難迹爲學人。羅睺羅迹爲無學。而本地不可思議。

以例餘二千人亦應各有本迹。觀心者。名字乃至分證四位。名爲學。究竟一位。名無學。理卽一位。非學。非無學。又六卽通皆非學。非無學。分證已去。而學而無學。又可理卽學無學。乃至究竟學無學。

庚 授下根記中。二授二千人記。二初請記。二授記。

辛 初中二。初二人請。次二千人請。

壬 初又二。初默念請。二發言請。

癸 今初

爾時阿難羅睺羅而作是念。我等每自思惟。設得授記。不亦快乎。

癸 二發言請。又二。初引例。二引墜。

子 今初

卽從座起。到於佛前。頭面禮足。俱白佛言。世尊。我等於此亦應有分。唯有如來。我等所歸。

子 二引墜

又我等爲一切世間天人阿修羅所見知識。阿難常爲侍者。護持法藏。羅睺羅是佛之子。若佛見授阿耨多羅三藐三菩提記者。我願旣滿。衆望亦足。

准前列衆。二人皆在多知識中。今與學無學二千人同受記者。爲引實故。四悉檀故。初二人請竟。

海華會義九
二
壬次二千人請

爾時學無學聲聞弟子二千人皆從座起偏袒右肩到於佛前一心合掌瞻仰世尊如阿難羅睺羅所願任立一面

但有引例一意而無引望故但默念請不發言也
初請記竟

①二授記二初記二人次記二千人 ②初中二

初記阿難二記羅睺羅 ③初又五初長文二

重頌三新發意者生疑四如來釋疑五阿難述

歎 ①今初

爾時佛告阿難汝於來世當得作佛號山海慧自在通王如來應供正徧知明行足善逝世間解無上士調御丈夫天人師佛世尊初明得果當供養六十二億諸佛護持法藏然後得阿耨多羅三藐三菩提二明行因教化二十千萬億恒河沙諸菩薩等令成阿耨多羅三藐三菩提三明說法度人國名常立勝幡其土清淨瑠璃為地劫名妙音徧滿四明國劫名字其佛壽命無量千萬億阿僧祇劫若人於千萬億無量阿僧祇劫中算數校討

不能得知。五明佛壽正法任世倍於壽命。像法任世復倍

正法。六明法任阿難。是山海慧自在通王佛。為十方無量

千萬億恒河沙等諸佛如來所共讚歎。稱其功德。七明

諸佛稱讚

子 二重頌

爾時世尊。欲重宣此義而說偈言

我今僧中說。阿難持法者。當供養諸佛。然後成正覺。

號曰山海慧自在通王佛。其國土清淨。名常立勝幡。

教化諸菩薩。其數如恒沙。佛有大威德。名聞滿十方。

壽命無有量。以愍眾生故。正法任倍壽。像法復倍是。

如恒河沙等。無數諸眾生。於此佛法中。種佛道因緣。

子 三新發意者生疑

爾時會中新發意菩薩八千人。咸作是念。我等尚不

聞諸大菩薩得如是記。有何因緣。而諸聲聞得如是

決

子 四如來釋疑

爾時世尊。知諸菩薩心之所念。而告之曰。諸善男子。

我與阿難等。於空王佛所。同時發阿耨多羅三藐三

法華會義九
三十五
菩提心。阿難常樂多聞。我常勤精進。是故我已得成
阿耨多羅三藐三菩提。而阿難護持我法。亦護將來
諸佛法藏。教化成就。諸菩薩衆。其本願如是。故獲斯
記。

子五阿難述歎

阿難面於佛前。自聞授記。及國土莊嚴。所願具足。心
大歡喜。得未曾有。卽時憶念過去無量千萬億諸佛
法藏。通達無礙。如今所聞。亦識本願。爾時阿難而說
偈言。

世尊甚希有。令我念過去無量諸佛法。如今日所聞
我今無復疑。安任於佛道。方便爲侍者。護持諸佛法
初記阿難竟

癸二記羅睺羅二。初長文。二重頌。子今初

爾時佛告羅睺羅。汝於來世當得作佛。號蹈七寶華
如來。應供。正徧知。明行足。善逝。世間解。無上士。調御
丈夫。天人師。佛。世尊。當供養十世界微塵等數諸佛
如來。常爲諸佛而作長子。猶如今也。是蹈七寶華佛
國土莊嚴壽命劫數。所化弟子。正法像法。亦如山海

慧自在通王如來無異。亦爲此佛而作長子。過是已後當得阿耨多羅三藐三菩提。

子二重頌

爾時世尊欲重宣此義而說偈言
我爲太子時。羅睺爲長子。我今成佛道。受法爲法子。
於未來世中。見無量億佛。皆爲其長子。一心求佛道。
羅睺羅密行。唯我能知之。現爲我長子。以示諸衆生。
無量億千萬。功德不可數。安住於佛法。以求無上道。

初記二人竟

壬次記二千人三。初長文。二重頌。三得記歡喜。

癸今初

爾時世尊見學無學二千人。其意柔軟寂然清淨。一心觀佛。佛告阿難。汝見是學無學二千人不。唯然已見。阿難。是諸人等當供養五十世界微塵數諸佛。如來恭敬尊重護持法藏。末後同時於十方國。各得成佛。皆同一號名曰寶相如來。應供正徧知。明行足。善逝。世間解。無上士。調御丈夫。天人師。佛。世尊。壽命一劫。國土莊嚴。聲聞菩薩。正法像法。皆悉同等。

癸二重頌

爾時世尊欲重宣此義而說偈言
是二千聲聞今於我前住悉皆與授記
未來當成佛
所供養諸佛如上說塵數護持其法藏
後當成正覺
各於十方國悉同一名號俱時坐道場
以證無上慧
皆名爲寶相國土及弟子正法與像法
悉等無有異
咸以諸神通度十方衆生名聞普周徧
漸入於涅槃
爾時學無學二千人聞佛授記歡喜踊躍而說偈言
○三得記歡喜

世尊慧燈明我聞授記音心歡喜充滿如甘露見灌
二迹門正說竟

釋授學無學人記品竟次釋法師品

法師品第十

此品明五種法師一受持二讀三誦四解說五書
寫大論明六種法師一信力故受二念力故持三
看文爲讀四不忘爲誦五宣傳爲說六聖人經書
難解須解釋今經合受持爲一合解說爲一足書
寫爲五若別論則四是自行解說一種是化他若

通論則自軌五法名自行法師。教他五法名化他法師。何以言之。法者軌則也。師者訓匠也。法雖可軌體不自弘通之在人。五種通經皆得稱師。舉法成其自行。皆以妙法爲師。師於妙法。自行成就。故名法師。又五種人能以妙法訓匠於他。故舉法目師。名爲法師。若自軌法。若法匠他。俱得稱法師品。此因緣釋也。自行化他不同。卽世界自行成就。卽生善化他除惡。卽對治自他俱得名法師。卽第一義約教者。四教各有能詮所詮。俱名爲法。各論自行化他。俱得稱師。今唯在圓也。就圓教五種

若作減數說者。束五爲四。卽四安樂行如後說。又束爲三。卽是三業。受持是意業。讀誦說是口業。書寫是身業。別論則口業是化他。身意是自行。通論則三業自軌。卽自行法師。三業教詔。卽化他法師。故言法師品。又是三門。行此五法以自熏修。卽福德門。弘宣五法廣利益他。卽化他門。自修益彼皆順佛教。卽報恩門。別論則自修報恩。各自行。益彼卽是化他。通論則自軌軌他。皆稱法師。故言法師品。又是三軌。讀誦書寫是外行。卽如來衣。受持是

內行卽如來座。解說益他。卽如來室。別論則室是
匠。他衣座自匠。通論則慈悲覆物。惠利歸己。名之
如室。遮彼惡障。已醜名之爲衣。安心於空。方能安
他。安他安己。名之爲座。此則自軌三法。亦名法師。
化他三法。亦名法師。利物必以慈悲。入室爲首。涉
有必以忍辱爲基。濟他必以亡我爲本。能行三法。
大教宣通。堪爲世間依止。故名法師品。又束爲二。
謂自行化他。此易可知。又束爲一。謂如來行。具一
切行。通論則悲拔一切苦。謂四趣三界二乘菩薩。

等苦。慈與一切樂。謂人天涅槃。常任等樂。柔和哀
障。一切醜。謂四任無知無明等醜。空座亡一切相。
謂有相無相。非有非無相。別論則慈悲生一切善。
柔和遮一切惡。空座蕩一切相。又慈忍立一切福。
德。空座成一切智慧。智慧是目。福德是足。又慈悲
勝一切聲聞緣覺。柔和勝一切凡夫外道。空座勝
析體偏等菩薩。又慈悲破天魔。柔和破陰魔。空破
煩惱魔。死魔。又慈忍故能問。空座故能答。具二莊
嚴。又觀空故能問。慈忍故能答。又慈忍故能種能。

立能資空慧。故能耘能破能導。又慈悲故何所隔。柔和故何所礙。空座故何所諍。故經言一切善法。慈爲根本。忍辱第一道。無相最上。無相卽諸法空若論圓行說不可盡。其如玄義一心五行攝一切行也。問何故約三法明法師答。若一往事論者。必須登堂整服坐座。乃可敷弘。故約三耳。若事理合論者。迷惑不出三種。一約苦果起惑。須用慈悲與拔。二約結業起惑。須用柔忍遠離。三約諦理起惑。須用法空了達也。初二屬專。後一屬理。事理並是所迷之境。若單約理者。迷真

法華會義

三

故墮苦須用慈悲門。迷俗故沉空受樂。須用和忍門。迷中故成智障。須用法空門也。本迹觀心可解。
丙迹門第三流通段。凡五品經。非止蔭益當時復欲津洽來世故也。一法師品。二寶塔品。皆明弘經功深福重利益廣大。三達多品。引往古弘經。彼我兼益。以證功德深重。四持品。八萬大士忍力成者。此土弘經新得記者。他土弘經。五安樂行品。外凡初心。欣斯勝福。見聲聞畏憚。聞菩薩擯辱。顧己力弱。無益自他。便生退沒。佛爲此人

法華會義

三

說安樂行。依之弘法不慮危苦。又法師品釋尊

自說弘經功福命覓流通。寶塔品多寶分身且

寶塔證法華經故來。分身助開寶塔故集。

證且助勸覓流通。初法師品二。初歎美能持法人。二歎美所持之

法及示通經方軌。初中二。初明稟道弟子

功深福重。二明授道師功深福重。初又二。

初佛世弟子。二滅後弟子。今初

爾時世尊。因藥王菩薩。告八萬大士。藥王。汝見是大衆中。無量諸天龍王。夜叉乾闥婆。阿修羅。迦樓羅。緊

那羅摩睺羅伽。人與非人。及比丘比丘尼。優婆塞。優婆夷。求聲聞者。求辟支佛者。求佛道者。如是等類。咸於佛前。聞妙法華經一偈一句。乃至一念。隨喜者。我皆與授記。當得阿耨多羅三藐三菩提。

因者憑寄也。告者普語也。藥王菩薩爲法焚身。八萬大士。忍力深固。故今流通妙法。先因藥王普告。八萬。欲其精勤護持。助宣故也。汝見是大衆等者。普授記也。不惟身子。四人滿慈。五百及千。二千。得記而已。舉凡八部四衆。求三乘人。但聞一偈一

法華會義
三十一
句。一念隨喜皆得成佛。決定無疑。故今普皆與授記也。一偈一句者。舉少以况多也。一念隨喜者。舉淺以况深也。所聞不論何偈何句。但合義合權實本迹十妙四一之流。功福皆爾。隨喜未論讀誦修行。但令能于一念心中。深解開權顯實。卽是理本非權非實。所以能權能實。權實不二。事理圓融。具煩惱性能知如來秘密之藏。又復卽于一念心中。廣解一切心及一切法。皆是佛法。無有障礙。若欲分別辯說無窮。法旣如此。人亦如是。下文常不輕

授四衆記。卽是得此意也。故大經云。寧願少聞多解義味。此義至後釋隨喜品。當更說之。

庚二滅後弟子

佛告藥王。又如來滅度之後。若有人聞妙法華經。乃至一偈一句。一念隨喜者。我亦與授阿耨多羅三藐三菩提記。

滅後聞經隨喜其功。福與佛現在是同。故亦同授記也。初明稟道弟子功深福重竟。

④二明授道師功深福重二。初長文。二偈頌。

庚

初中二。初別明。二總明。別者。人有下上。時有現
未。總者。不論下上。及以現未。通明逆之得罪。順
之得福也。⑤初別中二。初明現世。二明來世
⑥初又二。初明下品師。二明上品師。皆約凡位
判也。⑦今初

若復有人。受持讀誦。解說書寫。妙法華經。乃至一偈。
於此經卷。敬視如佛。種種供養。華香。瓔珞。末香。塗香。
燒香。繒蓋。幢幡。衣服。技樂。乃至合掌恭敬。

此先明下品師相也。一受持。二讀。三誦。四解說。五
書寫。卽是五種法師。一華。二香。三瓔珞。四末香。五
塗香。六燒香。七繒蓋。幢幡。八衣服。九技樂。十合掌。
卽是十種供養。

藥王當知。是諸人等。已曾供養十萬億佛。於諸佛所。
成就大願。愍衆生。故生此人間。藥王。若有人問。何等
衆生。於未來世。當得作佛。應示是諸人等。於未來世。
必得作佛。何以故。若善男子。善女人。於法華經。乃至
一句。受持讀誦。解說書寫。種種供養。經卷。華香。瓔珞。
末香。塗香。燒香。繒蓋。幢幡。衣服。技樂。合掌恭敬。是人

一切世間所應瞻奉。應以如來供養而供養之。當知此人是菩薩。成就阿耨多羅三藐三菩提。哀愍衆生。願生此間。廣演分別妙法華經。

此廣明下品師功報也。已曾供養等。是先因深愍衆生故等。明現功大。若有人問等。明未來報重。

癸二明上品師

何況盡能受持種種供養者。藥王當知。是人自捨清淨業報。於我滅度後。愍衆生故。生於惡世。廣演此經。先况出上品師相。次藥王當知下。略明上品師功。

報也。悲願牽故。仍是業生眷屬。未是神通應生。願兼於業。具如玄義眷屬妙說。初明現世竟。

子二明來世亦二。初明下品師。二明上品師。

癸

今初

若是善男子善女人。我滅度後。能竊爲一人說法華經。乃至一句。當知是人。則如來使。如來所遣。行如來事。

竊爲一人。極言所化之少。乃至一句。極言所說之少。良以有慧無聞。不堪處衆廣演。此明下品師相。

也然此經是如智所說說於如理。今行人秉此如教而宣如理故卽是如來使。如來之所遣也。又如智照如理爲事。今行人依如教行如理故是行如來事也。又以如智如理化衆生爲事。今行人能有大悲以此經中真如之理爲餘人說。令得利益故名行如來事。此明下品師功報也。觀心釋者。智心觀境境卽真如境來發智智爲如所使也。如來所遣者觀智從如中來也。行如來事者歷一切法無不真如真如卽佛事也。

◎二明上品師

何況於大衆中廣爲人說

以竊爲一人。況出普爲大衆。以乃至一句。況出廣說。此是上品師相。功報之大。不言可知。初別明竟。◎二總明現未下上法師。逆之得罪。順之得福。

樂王。若有惡人。以不善心。於一劫中。現於佛前。常毀罵佛。其罪尚輕。若人以一惡言。毀訾在家出家。讀誦法華經者。其罪甚重。

此先明逆之得罪也。夫罪福重輕。或時論田。或時

論心。或論損益有重有輕。今正約損益重輕論也。且如惡人以不善心。心既重矣。現前罵佛。由又尊矣。一劫常罵業又久矣。而云尚輕者。非謂罪報果輕。但尤未若毀訾讀誦法華之罪爲尤重耳。何以故。佛證平等大慈。恒于惡人生悲愍心。又非惡人所能逼惱。故彼罵者。始則譬如以禮送人。而人不受。持禍自歸。墮落三塗。百千億劫。終則譬如打罵梅檀。亦染香氣。反受佛化。畢竟得成出世因緣。今初心行人讀誦法華。忍力未成。易于退沒。倘一言

毀訾阻礙勝事。是斷佛種。損害尤深。故其罪甚重也。

藥王。其有讀誦法華經者。當知是人。以佛莊嚴而自莊嚴。則爲如來肩所荷擔。其所至方。應隨向禮。一心合掌。恭敬供養。尊重讚歎。華香瓔珞。末香塗香。燒香。繒蓋幢幡。衣服肴饌。作諸技樂。人中上供。而供養之。應持天寶。而以散之。天上寶聚。應以奉獻。所以者何。是人歡喜說法。須臾聞之。卽得究竟阿耨多羅三藐三菩提故。

此次明順之得福也。佛以定慧莊嚴。此人能修定慧。故言以佛莊嚴而自莊嚴也。在背爲荷。在肩爲擔。修非權非實。法身之體卽是爲如來荷。具能權能實二智之用。卽是爲如來擔。其所至方應隨向禮者。此人有所趣向。悉與實相相應。皆可敬順。順卽是向。敬卽是禮。敬而順之。及興供養也。應持天寶等。舉重况輕。天寶尚應奉供。况僅人中上供耶。所以者何下。釋成應禮應供之意。須臾卽得究竟。以能圓顯究竟妙理故也。仍須分別。始從名字究

竟。乃至究竟究竟。二明授道師功深福重中。初長文竟。

庚二偈頌三。初獎勸自行利他。二重頌別總兩義。三結歎經最第一。辛今初。

爾時世尊。欲重宣此義。而說偈言。

若欲任佛道。成就自然智。常當勤供養。受持法華者。其有欲疾得。一切種智慧。當受持是經。并供養持者。

辛二重頌別總兩義。二初頌別明。二頌總明。壬

初中二。初頌現世。二頌來世。癸今初。

法華會義九
三六
若有能受持妙法華經者。當知佛所使愍念諸衆生。諸有能受持妙法華經者。捨於清淨土。愍衆放生。此當知如是人。自在所欲生。能於此惡世廣說無上法。應以天華香及天寶衣服。天上妙寶聚供。養說法者。初二句頌下品師。次二句頌下品功報。次二句頌上品師。後十句頌上品功報也。

癸二頌來世

吾滅後惡世能持是經者。當合掌禮敬。如供養世尊。上饌衆甘美及種種衣服。供養是佛子。冀得須臾聞。

若能於後世受持是經者。我遣在人中。行於如來事。
初二句超頌上品師。次六句明上品功報。長文不言今偈
則次二句追頌下品師。後二句頌下品功報也。初

頌別明竟

壬二頌總明

若於一劫中。常懷不善心。作色而罵佛。獲無量重罪。其有讀誦持。是法華經者。須臾加惡言。其罪復過彼。有人求佛道。而於一劫中。合掌在我前。以無數偈讚。由是讚佛故。得無量功德。歎美持經者。其福復過彼。

法華會義九
三十一
於八十億劫以最妙色聲及與香味觸供養持經者如是供養已若得須臾聞則應自欣慶我今獲大利初二偈頌逆之得罪後四偈頌順之得福也讚佛功德固爲無量佛不因讚而有增進若讚持法華經經典所在卽爲有佛功德已同又使持經者從此增進所以福倍勝也二重頌別總兩義竟

③三結歎經最第一

藥王今告汝我所說諸經而於此經中法華最第一此經中猶言此諸經中卽通舉一代所說始自華

嚴終至涅槃也諸大乘經各各稱爲第一之說然是對待第一未若此經絕待第一故名最第一也初歎美能持法人竟

④二歎美所持之法及示通經方軌二初長文二偈頌 ⑤初中二初歎經法二示方軌 ⑥初

又五初約法歎二約人歎三約處歎四約因歎五約果歎 ⑦今初

爾時佛復告藥王菩薩摩訶薩我所說經典無量千萬億已說今說當說而於其中此法華經最爲難信

法華會義
四十一
難解。藥王。此經是諸佛秘要之藏。不可分布。妄授與人。諸佛世尊之所守護。從昔已來。未曾顯說。而此經者。如來現在。猶多怨嫉。况滅度後。

已說指般若已前漸頓諸說也。今說指同一座席無量義經也。當說指大涅槃經也。般若等漸頓諸經。皆帶方便。取信爲易。無量義經。明一生無量。未明無量還一。取信亦易。今法華經。論法則一切差別融通歸一。論人則師弟本迹俱甚久遠。二門悉與昔反。難信難解。當鋒難事。法華已說。涅槃在後。

則易可信也。秘要之藏者。隱而不說。名之爲秘。總一切法名之爲要。真如實相。包蘊無外。名之爲藏。不可分布者。法妙難信。惟有深智。乃可授與。無智益罪。故不可妄授也。從昔已來。未曾顯說者。於三藏中。不說二乘作佛。亦不明師弟本迹。方等般若。雖說實相。如來藏理。亦未說五乘作佛。亦未發迹顯本。頓漸諸經。皆未融會。故名爲秘。此經具說。昔所秘法。卽是開秘密藏。亦卽是秘密藏。如此秘藏。昔爲一類根熟衆生。雖有密說。而四十餘年。未曾

法華會義
四十一
彰灼顯說也。猶多怨嫉者如五千退席。佛世尚爾。何況未來。理在難化也。

②二約人歎

藥王當知。如來滅後。其能書持讀誦供養爲他人說者。如來則爲以衣覆之。又爲他方現在諸佛之所護念。是人有大信力及志願力。諸善根力。當知是人與如來共宿。則爲如來手摩其頭。

此法在人。則人尊貴。如來衣覆者。卽是修學大忍爲衣也。諸佛護念者。實相爲佛。實智爲子。尊崇實相發生實智。卽爲諸佛所護念也。圓教四不壞信。爲大信力。圓四弘誓爲志願力。圓妙大智爲善根力。信則信理。理卽法身。志願是立行。行卽解脫。善根根固難動。卽是般若。當知三力。卽三德秘藏。初心棲此。與佛不殊。故名與如來共宿。又信力修畢。竟空如來智。如來棲畢。竟空舍。此人亦學畢。竟空故。與如來共宿。以志願力善根力自行權實而爲機。感機感名頭。如來以化他權實二智之手。開發此人自行權實之頭。感應道交。故言摩頭。摩頭卽

授記也

辛三約處歎

藥王。在在處處。若說若讀若誦若書。若經卷所住處。皆應起七寶塔。極令高廣嚴飾。不須復安舍利。所以者何。此中已有如來全身。此塔應以一切華香瓔珞。繒蓋幢幡伎樂歌頌供養恭敬尊重讚歎。若有人得見此塔禮拜供養。當知是等皆近阿耨多羅三藐三菩提。

此法在處卽處尊貴。夫佛生處得道處轉法輪處。

入涅槃處皆應起塔。此經是法身生處得道之說。法輪正體。大涅槃窟。故應起塔供養也。不須復安舍利者。釋論云。碎骨是生身舍利。經卷是法身舍利也。已有如來全身者。生身舍利。有碎有全。碎如釋迦。全如多寶。法身舍利。亦有碎全。諸方便教爲碎。法華一實爲全也。四教五時委簡。或純碎無全。或全碎相半。唯法華爲純全。

辛四約因歎

藥王。多有人在家出家行菩薩道。若不能得見聞讀誦書持供養。是法華經者。當知是人未善行菩薩道。

若有得聞是經典者乃能善行菩薩之道

餘經帶方便因名爲拙度此經正顯圓因聞解圓

因方名巧度巧度爲善行也大論通以衍門爲巧今經別以一實爲巧

⑤五約果歎又五初明近果二立譬三法合四釋

近五揀非 ⑥今初

其有衆生求佛道者若見若聞是法華經聞已信解

受持者當知是人得近阿耨多羅三藐三菩提

阿耨菩提有二義一者初心菩提卽圓初住二者

後心菩提卽妙覺極果今言近者正近初住菩提

也前約因歎修通別因卽是未善去圓果遠若修

圓因卽是善行去圓果近今以圓如實智爲因還

以爲果道前真如雖有三因同名正因理道中真

如亦有三因同名緣因名字卽觀行卽相似卽亦名了因分

道後真如亦只三法轉名圓果究竟故普賢觀

云大乘因者諸法實相是大乘果者亦諸法實相

是釋論云初觀實相名因觀竟名果就理而論真

如實相不當因果亦非前後今約修行則有前後

及以因果也

壬二立譬

藥王譬如有人渴乏須水。於彼高原穿鑿求之。猶見乾土。知水尚遠。施功不已。轉見濕土。遂漸至泥。其心決定知水必近。

釋此爲二。一約觀門。二約教門。觀門者。衆生之心。具諸煩惱。各高原。修習觀智。各穿掘。方證理味。如得清水。約通觀。則乾慧地。如乾土。性地爲濕土。泥見諦爲得清水。約別觀。則從假入空。但見于空。不見不空斷。四住惑。如掘乾土。去水尚遠。從空入假。

先知非假。今知非空。因是二觀。得入中道。能伏無明。轉見濕土。去水則近。若圓觀中道。非空非假。而照空假。四住已盡。無明已伏。已得中道。相似圓解。故云如漸至泥。若入初住。發真中解。卽破無明。如泥澄清。得見中道。如得清水。故法華論云。佛性水。當知次第也。教門者。土譬經教。水譬中道。教詮中道。如土合水。三藏未詮中道。猶如乾土。方等般若。帶方便說中道。猶如濕土。法華正直顯露說中道。猶如泥。因法華教。生聞思修。卽悟中道。真見佛性。

所發真慧。不復依文。如獲清水。無復土相。故華嚴云。初發心時。便成正覺。成就慧身。不由他悟也。

⑤ 三法合

菩薩亦復如是。若未聞未解。未能修習。是法華經當知。是人去阿耨多羅三藐三菩提尚遠。若得聞解。思惟修習。必知得近。阿耨多羅三藐三菩提。

於法華中獲聞思修。卽是圓家三慧。方能近果。非乾濕等教中三慧也。

⑥ 四釋近

所以者何。一切菩薩阿耨多羅三藐三菩提。皆屬此經。此經開方便門。示真實相。是法華經藏深固幽遠。無人能到。今佛教化成就菩薩而爲開示。

一切菩薩指諸權因。阿耨菩提指諸權果。權因權果皆攝屬於此經。如乾濕等土。悉依于水也。開方便門。示真實相者。昔所不說。今皆說之。昔說二觀爲方便門。今皆開之。卽是真實。寧復是門。昔說小乘方便及小乘果。小乘果尚非實相。况小方便而當是門。今皆開之。卽是實相。汝等所行是菩薩道。

決了聲聞法是諸經之王。乃至治世語言。資生業等。昔何嘗說是方便。今皆開之。卽是實相不相違背。咸令衆生開示悟入佛之知見。一色一香無非佛法。若門若非門。悉皆開之。示真實相。顯佛性水。若不開者。則深固幽遠。無人能到。而今開之。卽得見水。無乾土也。

⑤ 五棟非

藥王。若有菩薩聞是法華經。驚疑怖畏。當知是爲新發意菩薩。若聲聞人。聞是經。驚疑怖畏。當知是爲增

上慢者

新發意菩薩。增上慢聲聞。旣于此經。驚疑怖畏。悉是乾土。尚非濕土。况能見水耶。初歎經法竟。

⑥ 二示方軌。二初正明方法。二明五利益。⑦ 初

中三。初標章。二解釋。三勸修。⑧ 今初

藥王。若有善男子善女人。如來滅後。欲爲四衆說是法華經者。云何應說。是善男子善女人。入如來室。著如來衣。坐如來座。爾乃應爲四衆廣說斯經。

⑧ 二解釋

如來室者。一切衆生中大慈悲心是。如來衣者。柔和忍辱心是。如來座者。一切法空是。

大慈悲室者。若就同體卽法身也。若被衆生卽解脫也能令衆生會於同體卽般若也。柔忍衣者。若就所覆卽法身也。若就能覆蓋身卽般若也。若就和光利物卽解脫也。法空座者。若就能坐卽般若也。若就所坐卽法身也。身座冥稱卽解脫也。又大慈安樂卽資成軌。柔和伏瞋斷惑卽觀照軌。坐座卽真性軌。安樂行中還廣此三法也。上云以佛莊

嚴又云以衣覆之卽此衣也。上云如來肩所荷擔又云手摩其頭卽此座也。上云與如來共宿卽此室也。

⑤三勸修

安住是中然後以不懈怠心爲諸菩薩及四衆廣說是法華經

旣勸安住三法仍勸不懈怠心然後廣說故知此昂觀行初心人耳。至相似位任運妙音徧滿三千不待勸也。初正明方法竟

辛 二明五利益

藥王。我於餘國遣化人爲其集聽法衆。一遣化人亦遣化

比丘比丘尼優婆塞優婆夷聽其說法。是諸化人聞

法信受隨順不逆。二遣化四衆若說法者在空閑處我時

廣遣天龍鬼神乾闥婆阿修羅等聽其說法。三遣八部我

雖在異國時時令說法者得見我身。四見佛身若於此經

忘失句讀。我還爲說令得具足。五與總持

若初心未淳止可遣化人未可遣化四衆八部。若

見天龍倚此自高妨損其道故不可令見也。若心

無倚著則堪見佛兼得總持證大利益况復天龍

等耶。二歎經法及示方軌中。初長文竟

④二偈頌三。初總勸。二頌長文。三結勸。⑤今初

爾時世尊欲重宣此義而說偈言

欲捨諸懈怠應當聽此經。此經難得聞信受者亦難

⑥二頌長文二。初但頌約果歎。二頌方軌。⑦初

中二。初頌立譬。二頌法合。略不頌近果釋近及

揀非也。⑧今初

如人渴須水。穿鑿於高原。猶見乾燥土。知去水尚遠。

漸見濕土泥決定知近水

⑤二頌法合

藥王汝當知。如是諸人等。不聞法華經。去佛智甚遠。
若聞是深經。決了聲聞法。是諸經之王。聞已諦思惟。
當知此人等。近於佛智慧。

初但頌約果歎竟

⑥二頌方軌二初頌正明方法。二頌明五利益

⑦今初

若人說此經。應入如來室。著於如來衣。而坐如來座。

處衆無所畏。廣爲分別說。大慈悲爲室。柔和忍辱衣。
諸法空爲座。處此爲說法。若說此經時。有人惡口罵。
加刀杖瓦石。念佛故應忍。

初偈半頌標章。次一偈頌解釋。後一偈頌勸修也。
⑧二頌明五利益

我千萬億土。現淨堅固身。於無量億劫。爲衆生說法。
此總明如來以五事利益之意。正由應身徧滿十
方能爲五事。守護行人也。

若我滅度後。能說此經者。我遣化四衆。比丘比丘尼。

法華會義九
及清淨士女俱養於法師

此超頌第二遣四衆也

引導諸衆生集之令聽法。若人欲加惡刀杖及瓦石。則遣變化人爲之作衛護。

此追頌第一遣化人也

若說法之人獨在空閑處寂寞無人聲讀誦此經典。我爾時爲現清淨光明身。若忘失章句爲說令通利。此超頌第五與總持也。

若人具是德或爲四衆說空處讀誦經皆得見我身

此頌第四令見佛也。具是德謂室衣座三德。

若人在空閑我遣天龍王夜叉鬼神等爲作聽法衆。是人樂說法分別無罣礙諸佛護念故能令大衆喜。

此追頌第三遣八部也。二頌長文竟。

庚三結勸

若親近法師速得菩薩道隨順是師學得見恒沙佛。

法師品竟

妙法蓮華經台宗會義卷四之一

翁
分印

妙法蓮華經台宗會義卷四之二
塔。具云塔婆。或云偷婆。新云宰堵波。此翻方墳。亦
翻靈廟。亦翻高顯。亦翻浮圖。有舍利者名塔。無舍
利者名支提。舍利復論全碎。如釋迦碎身為八斛
舍利。阿育王後造八萬四千寶塔以供養之。徧布
天下名山。今多寶佛全身舍利不散。故唯一塔。又
按律中四處起塔。謂佛生處。得道處。轉法輪處。入

妙法蓮華經台宗會義卷四之二

古吳後學滿益智旭述

見寶塔品第十一

塔。具云塔婆。或云偷婆。新云宰堵波。此翻方墳。亦
翻靈廟。亦翻高顯。亦翻浮圖。有舍利者名塔。無舍
利者名支提。舍利復論全碎。如釋迦碎身為八斛
舍利。阿育王後造八萬四千寶塔以供養之。徧布
天下名山。今多寶佛全身舍利不散。故唯一塔。又
按律中四處起塔。謂佛生處。得道處。轉法輪處。入

法華會義
涅槃處。今法華實相。諸佛三身皆從此生。諸佛於此而坐道場。諸佛於此而轉法輪。諸佛於此而般涅槃。祇此法華卽是三世佛之四塔。先佛已居。今佛並坐。當佛亦然。此塔出來。明顯此事。四衆皆觀。故言見寶塔品。世界。瓔珞經云。供養一佛舍利起塔。滿四天下。不如供養如來生身。由色身有舍利故。又起塔滿大千。供養色身。不如供養法身。由法身有色身故。當知見色不及聞經。以由聞經有法身故。經有偏圓。卽法身全碎。功德不等。今經純詮圓

理是全法身。故持經功深。弘宣力大。多寶佛塔從地涌出。證明此事。四衆皆觀。故言見寶塔品。人爲三。周說法已。竟從地涌出。出大音聲。再歎善哉。印成實說。卽是證前。爲開塔故。須集分身。旣開塔已。入塔並坐。大聲普告。召本弟子。由疑地涌。方明壽量。展轉爲由。卽是請後。正爲證前。請後從地涌出。四衆皆觀。故言見寶塔品。治對。多寶示滅。全身舍利儼然不散。又聞其言。則是滅而不滅。可表法身。釋尊入塔。二身相稱。如智稱境。可表報身。分身雲集。可

法華會義一
表應身三佛三身而不一異。令四衆觀。故言見寶

塔品

第一義

塔出有兩意。一發音聲以證前。三周說

法流通功德皆是真實。不同兼但對帶之談。卽約
教義。二因開塔以起後。聲徹下方。召本弟子。乃明
長壽頓破寂場近成之疑。卽本迹義。又久遠之塔
從地涌出。開自在神通之力。顯過去世益物也。發
大音聲。開師子奮迅之力。顯現在十方開權顯實
也。有大誓願未來諸佛若說此經我之寶塔皆到
其所爲作證明。開大勢威猛之力。顯未來常住不

滅也。觀心釋者。依經修觀與法身相應。境智必會。
如塔來證經。境智旣會。則大報圓滿。如釋迦與多
寶同坐一座。大報圓故。則隨機出應。如分身皆集
由多寶出故。三佛得顯。由持經故。卽具三身。普賢
觀云。佛三種身從方等生。卽此義也。

①迹門流通中。第二見寶塔品爲二。初長文。二偈

頌。②初中三。初明多寶涌現。二明分身遠集。

三明釋迦唱募。③初又六。初現塔之相。二諸

天供養。三多寶稱歎。四時衆驚疑。五大樂說問。

法華會義十
六如來答

庚今初

爾時佛前有七寶塔。高五百由旬。縱廣二百五十由旬。從地涌出。住在空中。種種寶物而莊校之。五千欄楯。龕室千萬。無數幢幡。以爲嚴飾。垂寶瓔珞。寶鈴萬億。而懸其上。四面皆出多摩羅跋梅檀之香。充徧世界。其諸幡蓋。以金銀琉璃。磲磔碼碯。真珠玫瑰。七寶合成。高至四天王宮。

七寶表性德。七覺。七聖法財也。塔表實相之境。法身所依處也。四教各論七覺七財。今唯在圓。因位亦有七覺七財。今約極果。七覺七財。

皆是修得。今明全性起修。全修顯性。故是無作性德。高五百由旬者。是二萬里。豎表因中萬行果中萬德也。縱廣二百五十由

旬者。是一萬里。橫表萬善莊嚴也。地表無明心地。空表第一義空。以無所破。破無明地。以無所住。住第一義空。故言從地涌出。住在空中。此亦證前起後。七方便人藏理未開。無明所隱。如塔在地。今聞三周開顯。開佛知見。顯出法身。如塔涌空。此卽證前。修得法身。久已明著。如塔在空。無能開者。表本地久成。衆所不識。若發迹顯本。了達無疑。此卽起

後也。若塔從地出。表法身顯。與餘經亦同。亦異。菩薩顯法身則同。二乘顯法身則異。若塔在空開門見佛。表發迹顯本。與餘經永異。若塔來證前事已彰灼。蓋不須疑。塔來起後。則密有其意。衆所未知也。種種寶物者。表衆多定慧。而莊校也。欄楯表總持。龕室表無量慈悲室。亦表無量空舍。幢幡表神通勝相。垂諸瓔珞表四十地戒定慧陀羅尼功德。上嚴法身。下被衆生也。寶鈴表八音四辯。四面出香表無作四諦道風。吹四德香也。七寶幡蓋高至

四天王宮。表神通慈力。皆是性德七覺七財所成。皆窮無作四諦之理也。

庚二諸天供養

三十三天。雨天曼陀羅華。供養寶塔。餘諸天龍夜叉。乾闥婆。阿修羅。迦樓羅。緊那羅。摩睺羅伽人。非人等。千萬億衆。以一切華香。瓔珞。幡蓋。伎樂。供養寶塔。恭敬尊重讚歎。

事解可知。更約理者。三十三天。卽表任行向爲三十。十地爲一。等覺爲一。妙覺爲一。合爲三十三。同

法華會義 五
依實相第一義境也。雨天曼陀羅華者。初心亦具四十二地功德。後心亦爾。皆以四十地所有因華歸向法身也。餘諸天龍下。卽表內凡外凡等。亦依實相。向果行因也。

庚 三多寶稱歎

爾時寶塔中出大音聲。歎言。善哉善哉。釋迦牟尼世尊。能以平等大慧。教菩薩法。佛所護念。妙法華經。爲大衆說。如是如是。釋迦牟尼世尊。如所說者。皆是真實。

善哉善哉。歎其契理契機也。平等有二義。一法平等。卽中道理。二生平等。一切衆生同得佛慧。大者如前高廣義也。如是如是者。一如法性實理之是。二如衆生根性之是。故皆是真實也。此正證前開權顯實不虛。

庚 四時衆驚疑

爾時四衆見大寶塔住在空中。又聞塔中所出音聲。皆得法喜。怪未曾有。從座而起。恭敬合掌。卻住一面。皆得法喜。顯領證前。怪未曾有。起住一面。密助起。

後也

庚五大樂說問

爾時有菩薩摩訶薩名大樂說。知一切世間天人阿
修羅等心之所疑。而白佛言。世尊。以何因緣有此寶
塔從地涌出。又於其中發是音聲。

准下答意問亦有三。一問何因有此塔。二問何故
塔從地出。三問何故發是音聲也。

庚六如來答爲三。初超答何故涌出。二追答何因
有塔。三答何故發是音聲。辛今初表一。

爾時佛告大樂說菩薩。此寶塔中。有如來全身。乃往
過去。東方無量千萬億阿僧祇世界。國名寶淨。彼中
有佛號曰多寶。其佛行菩薩道時。作大誓願。若我成
佛。滅度之後。於十方國土。有說法華經處。我之塔廟
爲聽是經故。涌現其前。爲作證明。讚言善哉。

此明寶塔爲證法華。所以從地涌出也。問。前云地
涌。今日東方何耶。答。東是述其本緣。涌乃申其昔
願。不相乖也。若約表法。則東方爲羣方之首。所以
表開地涌。所以表顯。

法華會義
二追答何因有塔。由彼佛命。令造此塔也。

彼佛成道已。臨滅度時。於天人大衆中。告諸比丘。我滅度後。欲供養我全身者。應起一大塔。

三答何故發是音聲。由有神通本願故也。

其佛以神通願力。十方世界在在處處。若有說法華經者。彼之寶塔皆涌出其前。全身在於塔中。讚言善哉善哉。大樂說。今多寶如來塔。聞說法華經。故從地涌出。讚言善哉善哉。

釋論明多寶佛不得說法而取滅度。南嶽師云。彼

佛告諸比丘。比丘卽受化之人。何謂全不說法。當是但得施三。不得顯一。故云不得說法耳。以是義故。雖復滅度。在在處處。有說法華。便皆隨喜作證也。問。十方世界。豈無他佛。不得開顯。若不開顯。皆應發願。何獨多寶。若不發願。佛道不同。若發願者。皆合聽經。又諸佛化。皆預照機。豈待成佛。不得開顯。方始發願。答。同與不同。開與不開。有願無願。皆是隨緣。若宜有願。皆悉盡來。何慮不集。後方發願。亦是鑑機。初明多寶涌現竟。

法華會義一
②二明分身遠集七。初大樂說請見多寶。二明應

集分身。三大樂說請集。四放光遠召。五諸佛同

來。六嚴淨國界。七與欲開塔。庚今初

是時大樂說菩薩以如來神力故。白佛言。世尊。我等

願欲見此佛身。

欲開塔。須集佛。集佛卽付囑。付囑卽召下方。下方

出卽應開近顯遠。此是大事之由。故是如來神力

令問也。

庚二明應集分身

佛告大樂說菩薩摩訶薩。是多寶佛。有深重願。若我

寶塔。爲聽法華經故。出於諸佛前時。其有欲以我身

示四衆者。彼佛分身諸佛在於十方世界說法盡還

集一處。然後我身乃出現耳。大樂說。我分身諸佛在

於十方世界說法者。今應當集。

須集分身。乃可開塔。正密示本地功德也。根深則

枝茂。源遠則流長。分身旣爾。橫徧十方。本地寧不

豎超塵劫。

庚三大樂說請集

大樂說白佛言。世尊。我等亦願欲見世尊分身諸佛
禮拜供養。

庚四放光遠召

爾時佛放白毫一光。卽見東方五百萬億那由他恒
河沙等國土諸佛。彼諸國土皆以玻瓈爲地。寶樹寶
衣以爲莊嚴。無數千萬億菩薩充滿其中。徧張寶幔
寶網覆上。彼國諸佛以大妙音而說諸法。及見無量
千萬億菩薩徧滿諸國。爲衆說法。南西北方。四維上
下。白毫相光所照之處。亦復如是。

分身諸佛多是淨土。惟此娑婆。乃是穢土。佛能于
此娑婆穢土說法華經。蓋是難中之難。然因茲穢
土。所以必須爲實施權。又因施權。所以必須開權
顯實。因此顯實。方得具明如來設化之妙。原始要
終。罄無不盡。可謂蓮出淤泥也。又復應知。此土釋
迦。則指諸佛爲分身。各土之佛。又指餘佛及釋迦
爲分身。此土說法華經。諸佛既來與欲開塔。各土
有說法華經處。諸佛及此土釋迦亦必同往與欲
開塔。是則淨穢交徹。彼此互融。賓主歷然。能所不

二。一乘實相之旨。法界無礙之宗。昭昭在視聽間矣。

庚五諸佛同來

爾時十方諸佛各告衆菩薩言。善男子。我今應往娑婆世界釋迦牟尼佛所。并供養多寶如來寶塔。

庚六嚴淨國界三。初變娑婆。二變八方各二百萬億那由他。三更變八方各二百萬億那由他。

辛今初

時娑婆世界卽變清淨。瑠璃爲地。寶樹莊嚴。黃金爲

繩以界八道。無諸聚落村營城邑大海江河山川林藪。燒大寶香。曼陀羅華徧布其地。以寶網幔羅覆其上。懸諸寶鈴。唯留此會衆。移諸天人置於他土。是時諸佛各將一大菩薩以爲侍者。至娑婆世界。各到寶樹下。一一寶樹高五百由旬。枝葉華果次第莊嚴。諸寶樹下皆有師子之座。高五由旬。亦以大寶而校飾之。爾時諸佛各於其座結加趺坐。如是展轉徧滿三千大千世界。而於釋迦牟尼佛一方所分之身猶故未盡。

法華會義一
十一
辛二變八方各二百萬億那由他

時釋迦牟尼佛欲容受所分身諸佛故。八方各更變二百萬億那由他國皆令清淨。無有地獄餓鬼畜生及阿修羅。又移諸天人置於他土。所化之國亦以瑠璃爲地。寶樹莊嚴。樹高五百由旬。枝葉華果次第嚴。餽樹下皆有寶師子座。高五由旬。種種諸寶以爲莊校。亦無大海江河。及目真隣陀山。摩訶目真隣陀山。鐵圍山大鐵圍山。須彌山等諸山王。通爲一佛國土。寶地平正。寶交露幔徧覆其上。懸諸幡蓋。燒大寶香。

諸天寶華徧布其地

辛三更變八方各二百萬億那由他

釋迦牟尼佛爲諸佛當來坐故。復於八方各更變二百萬億那由他國。皆令清淨。無有地獄餓鬼畜生及阿修羅。又移諸天人置於他土。所化之國亦以瑠璃爲地。寶樹莊嚴。樹高五百由旬。枝葉華果次第莊嚴。樹下皆有寶師子座。高五由旬。亦以大寶而校飾之。亦無大海江河。及目真隣陀山。摩訶目真隣陀山。鐵圍山大鐵圍山。須彌山等諸山王。通爲一佛國土。寶

地平正寶交露幔徧覆其上。懸諸幡蓋燒大寶香。諸天寶華徧布其地。爾時東方釋迦牟尼佛所分之身百千萬億那由他恒河沙等國土中諸佛。各各說法來集於此。如是次第十方諸佛皆悉來集。坐於八方。爾時一一方四百萬億那由他國土。諸佛如來徧滿其中。

三變土淨。正由三昧。三昧有三。初變娑婆是背捨力。能變穢爲淨。次變八方各二百萬億那由他。是勝處力。轉變自在。三變八方更各二百萬億那由

他。是十一切處力。廣普無礙。又初一變表淨除見思。第二變表淨除塵沙。第三變表淨除無明也。問華嚴經中十方同名諸佛菩薩來證所說法門。但云充滿十方。不云變穢爲淨。正顯淨穢平等。淨穢無性。又顯自他不隔。大小無礙也。今變穢爲淨。則淨穢未忘。移諸天人。則自他相隔。欲容分身而更變土。則大小宛存。得無不及華嚴耶。答。諸經所用神通。不論多少廣狹。貴在被機顯理。華嚴獨被大機。直顯圓理。故神力境界雖多且廣。未是難事。今

經開小成。太卽偏明圓。如破勁敵。故爲希有。况淨
穢設實。有性何能變穢爲淨。自他設果。有隔何能
安然被移。大小設果。有礙何能通爲一土。當知融
絕淨穢。彼此大小之事。而顯理者。猶是事理無礙
門也。不壞淨穢。彼此大小之事。而卽顯無淨無穢
無彼無此。無大無小之理。雖顯無淨無穢。無彼無
此。無大無小之理。而淨穢彼此大小之事。仍歷然
者。正是事事無礙門也。是故若約平等大慧。則華
嚴方等。般若法華。不應妄計優劣。若約開權顯實。

開迹顯本。則法華獨擅其功。善讀經者。貴達體宗
用相。不當徒以事迹而妄較評。致于如來所說大
法。一讚一毀。如讚帝釋而毀憍尸迦也。問。三變土
淨。應是首楞嚴三昧力。何以仍用小乘事禪。答。小
乘背捨。僅變小千。勝處。僅變中千。十一切處。僅變
大千。今開權顯實。卽小事禪。是首楞嚴。故名雖附
小。力用則大也。問。若爾。則隨一三昧。便能三變。何
必定用三三昧耶。答。亦正不壞諸法假名故也。問。
若小乘三種三昧。不能徧破三惑。若佛果三種三

昧不應次第破惑。答。旣首楞嚴卽理之事。自能一
一圓破三惑。今約三昧。正論功用。復約所表。故云
破惑。功用。在佛。所表。在機。機雖三根。已破三惑。後
來。仍當更破。故也。六嚴淨國界竟。

⑤七與欲開塔。又五。初諸佛問訊說欲。二釋迦開
塔。三四衆皆同見聞。四二佛分座而坐。五四衆

請加處空。

⑥今初

是時諸佛。各在寶樹下。坐師子座。皆遣侍者。問訊釋
迦牟尼佛。各齋寶華。滿掬而告之言。善男子。汝往詣

耆闍崛山。釋迦牟尼佛所。如我辭口。少病少惱。氣力
安樂。及菩薩聲聞衆。悉安隱不。以此寶華。散佛供養。
而作是言。彼某甲佛。與欲開此寶塔。諸佛遣使。亦復
如是。

諸佛同與欲開塔。如僧中作法與欲意也。大集明
若干佛與欲。大品亦明于佛同說般若。然皆不云
卽是釋迦分身。準今經者。應是分身。彼帶方便。故
不顯說耳。今經非但數多。亦直說是分身。咸來與
欲也。

法華會義
二釋迦開塔

爾時釋迦牟尼佛。見所分身佛悉已來集。各各坐於師子之座。皆聞諸佛與欲同開寶塔。卽從座起。住虛空中。一切四衆。起立合掌。一心觀佛。於是釋迦牟尼佛。以右指開七寶塔戶。出大音聲。如郤闕鑰開大城門。

以右指開表用權也。開塔表開權。見佛表顯實。卽是證前。又將開後。故以如郤闕鑰表郤障開大城門。密表開迹也。

三四衆同皆見聞

卽時一切衆會皆見多寶如來。於寶塔中坐師子座。全身不散。如入禪定。又聞其言。善哉善哉。釋迦牟尼佛。快說是法華經。我爲聽是經故而來至此。爾時四衆等。見過去無量千萬億劫滅度佛說如是言。歎未曾有。以天寶華聚。散多寶佛及釋迦牟尼佛上。爾時多寶佛。於寶塔中。分半座與釋迦牟尼佛。而作是言。釋迦牟尼佛。可就此座。卽時釋迦牟尼佛。入其

四二佛分座而坐

法華會義
十六

塔中坐其半座結加趺坐

⑤五四衆請加處空

爾時大衆見二如來在七寶塔中師子座上結加趺坐各作是念佛坐高遠惟願如來以神通力令我等輩俱處虛空卽時釋迦牟尼佛以神通力接諸大衆皆在虛空

問衆俱在空分身何故猶處於地答時衆已聞迹門開權初入常寂光土故以空居表之分身示迹各有所化之土故居地以表之又釋迦不久顯本

亦先居空以表之各有其致不須疑也二明分身遠集竟

⑥三明釋迦唱募

以大音聲普告四衆誰能於此娑婆國土廣說妙法華經今正是時如來不久當入涅槃佛欲以此妙法華經付囑有在

一募誰能廣說謂於此娑婆二明付囑時至謂當入涅槃三明付囑有在此復二意一者近明有在意指法師品初八萬大士持品之初二萬菩薩及

世尊所視八十萬億那由他諸菩薩衆。二者遠明
有在意指地。涌本弟子衆。令觸處流通。又發起壽
量也。初長文竟。

戊 二偈頌三。初頌多寶。二頌分身。三頌付囑。

巴

今初

爾時世尊欲重宣此義而說偈言

聖主世尊。雖久滅度。在寶塔中。尚爲法來。諸人云何。
不勤爲法。此佛滅度。無央數劫。處處聽法。以難遇故。
彼佛本願。我滅度後。在在所住。常爲聽法。

巴 二頌分身

又我分身。無量諸佛。如恒沙等。來欲聽法。及見滅度。
多寶如來。各捨妙土。及弟子衆。天人龍神。諸供養事。
令法久住。故來至此。爲坐諸佛。以神通力。移無量衆。
令國清淨。諸佛各各詣寶樹下。如清淨池。蓮華莊嚴。
其寶樹下。諸師子座。佛坐其上。光明嚴飾。如夜闍中。
然大炬火。身出妙香。徧十方國。衆生蒙熏。喜不自勝。
譬如大風。吹小樹枝。以是方便。令法久住。

上明分身遠集。共有七文。今頌甚略。初三偈頌第

法華會義一
二應集義兼初請見多寶及三請集。次一偈頌淨國界。後四偈半頌諸佛同來。

④三頌付囑。二初舉三佛以勸流通。二舉難持之法以勸流通。⑤初中三。初募覓其人。二正舉

三佛以勸持經。三釋勸意。⑥今初。

告諸大衆。我滅度後。誰能護持。讀說斯經。今於佛前自說誓言。

⑦二正舉三佛以勸持經。

其多寶佛。雖久滅度。以大誓願。而師子吼。多寶如來。

及與我身。所集化佛。當知此意。諸佛子等。誰能護法。當發大願。令得久住。

⑧三釋勸意。

其有能護此經法者。則爲供養我及多寶。此多寶佛處於寶塔。常遊十方。爲是經故。亦復供養諸來化佛。莊嚴光飾諸世界者。若說此經。則爲見我多寶如來。及諸化佛。

能護持經。卽爲供養三佛。若說此經。卽爲具見三佛。所以釋勸意也。初舉三佛以勸流通竟。

庚 二舉難持之法以勸流通。二初正舉勸。二釋勸
意。辛 初中三。初誡勸。二正舉難持以勸。三釋
難持意。壬 今初

諸善男子。各諦思惟。此爲難事。宜發大願。

壬 二正舉難持以勸

諸餘經典數如恒沙。雖說此等。未足爲難。若接須彌
擲置他方。無數佛土。亦未爲難。若以足指動大千界。
遠擲他國。亦未爲難。若立有頂爲衆演說。無量餘經。
亦未爲難。若佛滅後於惡世中能說此經。是則爲難。

假使有人。手把虛空。而以遊行。亦未爲難。於我滅後。
若自書持。若使人書。是則爲難。若以大地置足。甲上。
升於梵天。亦未爲難。佛滅度後。於惡世中。暫讀此經。
是則爲難。假使劫燒。擔負乾草。入中不燒。亦未爲難。
我滅度後。若持此經爲一人說。是則爲難。若持八萬。
四千法藏。十二部經。爲人演說。令諸聽者。得六神通。
雖能如是。亦未爲難。於我滅後。聽受此經。問其義趣。
是則爲難。若人說法。令千萬億。無量無數。恒沙衆生。
得阿羅漢具六神通。雖有是益。亦未爲難。於我滅後。

若能奉持。如斯經典。是則爲難。

八萬四千法藏。十二部經。俱通大小。弘通前四味教。皆帶方便。故猶易持。說此經。純明一實。故倍難也。

⑤ 三釋難持意

我爲佛道於無量土。從始至今。廣說諸經。而於其中。此經第一。若有能持。則持佛身。不但此土四十餘年。未曾顯說。卽無量土中。從始至今。所說雖多。亦未有如此經之深談佛意者。此

經體宗用三。衣座室三。卽是佛之三身。能持卽持佛身。此意豈易。初正舉勸竟。

⑥ 二釋勸意三。初重募持經之人。二明能持難持。則諸佛喜歎。三明卽成自行化他勝行。⑦ 今

初

諸善男子。於我滅後。誰能受持。讀誦此經。今於佛前自說誓言。

⑧ 二明能持難持。則諸佛喜歎。

此經難持。若暫持者。我則歡喜。諸佛亦然。如是之人。

諸佛所歎

⑤三明卽成自行化他勝行

是則勇猛。是則精進。是名持戒。行頭陀者。則爲疾得無上佛道。能於來世讀持此經。是真佛子。住淳善地。此自行勝行也。

佛滅度後能解其義。是諸天人。世間之眼。於恐畏世能須臾說。一切天人。皆應供養。此化他勝行也。見寶塔品竟。

提婆達多品第十二

提婆達多。亦言達兜。亦云調達。此翻天熱。以其應行三逆。所以生時。人天心熱。因此立名。卽因緣釋

也。問。惡人出世。何名感應。答。令無量人不敢造惡。亦具四悉。見者喜。已身不作。卽世界。不作生善。卽爲人。不作惡。卽對治。無障果事。卽第一義。約教者。前三教逆。祇是逆

今卽逆而順。是圓教意。本迹者。本地清涼。衆生煩惱。故菩薩示熱。同其病行而度脫之。大經云。提婆達多。必不破僧。報恩經云。若有人言。提婆達多。實是惡人。入阿鼻獄者。無有是處。大雲經云。提婆達多。不可思議。所有行業。同於如來。觀心者。究竟斷

彼異相諸陰和合積集名爲破僧。究竟斷彼諸使
習氣種子。名爲害阿羅漢。究竟斷彼七種識身煩
惱所知種種染汙。名爲惡心出佛身血。出楞伽
經第三什
師譯經竟。宮人請此品淹留在內。江東僅傳二十
七品。梁有滿法師講經百徧。於長沙郡燒身。仍以
此品安持品前。南岳大師亦以此品次寶塔品後。
後見長安舊本。方知二師深得經意。

①此迹門流通第三品來。意引古弘經傳益非謬。
明今宣化事驗不虛。舉往勸今。使流通也。文爲

二。初明昔日達多通經。釋迦成道。二明今日文
殊通經。龍女作佛。稟教尚然。宣通之功。益豈不
大。故達多受記。文殊可以意知。④初中三。初
明往昔師弟持經之相。二結會古今。三勸信
⑤初又二。初長文。二偈頌。⑥長文又四。初明
求法時節。二正明求法。三求得法師。四受法奉
行。⑦今初
爾時佛告諸菩薩及天人四衆。吾於過去無量劫中。
求法華經。無有懈倦。

法華會義一
二正明求法又二初明發願二明修行 ⑤今
初

於多劫中常作國王發願求於無上菩提心不退轉

⑥二明修行又二初明欲滿檀那勤行布施二明

為滿般若勤求妙法 ⑦今初是又二初

為欲滿足六波羅蜜勤行布施心無憍惜象馬七珍

國城妻子奴婢僕從頭目髓腦身肉手足不惜驅命

⑧二明為滿般若勤求妙法 ⑨宣讀之也益

時世人民壽命無量為於法故捐捨國位委政太子

擊鼓宣令四方求法誰能為我說大乘者吾當終身
供給走使

二正明求法竟

⑩三求得法師

時有仙人來白王言我有大乘名妙法華經若不違

我當為宣說

⑪四受法奉行

王聞仙言歡喜踊躍即隨仙人供給所須采果汲水

拾薪設食乃至以身而為牀座身心無倦于時奉事

經於千歲爲於法故精勤給侍令無所乏

初長文竟

⑧二偈頌四。初頌時節及正求法。二頌求得法師。

三頌受法奉行。四結證勸信。⑨今初

爾時世尊欲重宣此義而說偈言

我念過去劫爲求大法故。雖作世國王。不食五欲樂。
椎鐘告四方。誰有大法者。若爲我解說。身當爲奴僕。

⑩二頌求得法師

時有阿私仙。來白於大王。我有微妙法。世間所希有。

若能修行者。吾當爲汝說

⑪三頌受法奉行

時王聞仙言。心生大喜悅。即便隨仙人。供給於所須。
采薪及果祿。隨時恭敬與。情存妙法故。身心無懈倦。
普爲諸衆生。勤求於大法

⑫四結證勸信

亦不爲己身。及以五欲樂。故爲大國王。勤求獲此法。
遂致得成佛。今故爲汝說

初明往昔師弟持經之相竟

法華會義
二五
巴 二結會古今二。初正結會。二明師弟功報俱滿。
寅 今初。

佛告諸比丘。爾時王者則我身是。時仙人者。今提婆達多是。

庚 二明師弟功報俱滿。又二。初明弟子圓因報滿。

二明法師妙果當成。辛 今初。

由提婆達多善知識故。令我具足六波羅蜜。慈悲喜

捨

比。先明因圓也。問。提婆達多。世世爲佛。怨云何。而

言是善知識。答。入大乘論云。若是怨者。云何能得
世世相值。如二人行東西各去。步步轉遠。豈得爲
伴耶。六度義甚多。今當略說。如大論云。捨依正名
檀。防止七支名戒。打罵不報名忍。爲事始終名精
進。四禪八定名禪。分地息諍名般若。又束十善爲
六度者。不殺至不妄語是檀。不兩舌是尸。不惡口
是忍。不綺語是進。不貪瞋是禪。不邪見是般若。又
菩薩善戒經第十云。六波羅蜜有三種。一對治。謂
慳惡瞋息亂癡。二相生。謂捨家持戒。遇辱須忍。忍

法華會義 三十五
已精進進已調五根。根調知法界。三果報謂大富
饒財諸根具足。容色端正。有大威力壽命安康辯
才無礙。又餘經云。施報富戒報善道。忍報端正。進
報神通。禪報生天。慧報破煩惱。如是等例。皆是三
藏明六度相也。若施者受者財物三事皆空。名檀。
不見持犯。名戒。能忍所忍。不可得名忍。身心不動。
名精進。不亂不味。名禪。非智非愚。名般若。如此流
例。卽通教中六度相。若言檀有十利。一伏慳煩惱。
二捨心相續。三與衆生同資產。四生豪富家。五生

生。施心現前。六四衆愛樂。七處衆不怯畏。八勝名
徧布。九手足柔軟。十乃至詣道場。恒值善知識。戒
有十利。一滿一切智。二如佛所學。三智者不毀。四
誓願不退。五安任正行。六棄捨生死。七慕樂涅槃。
八得無纏心。九得勝三昧。十不失信財。忍有十利。
一二三四。火刀毒水皆不能害。五非人所護。六身
相莊嚴。七閉惡道。八生梵天。九晝夜常安。十身不
離喜樂。精進有十利。一他不能折伏。二佛所攝。三
非人所護。四聞法不忘。五未聞能聞。六增長辯才。

法華會義
三十一
七得三昧性。八少煩惱。九隨食能消。十如優鉢華
增長。禪有十利。一安住儀式。二行慈境界。三無悔
熱。四守護諸根。五得無食喜。六離愛欲。七修禪不
空。八解脫魔網。九安住佛境。十解脫成熟。般若
十利。一不取施相。二不依戒。三不住忍力。四不離
身心精進。五禪無所住。六魔不能擾。七他言論不
能動。八達生死底。九起增上慈。十不樂二乘地。復
次四事應修檀。一破慳貪故。二莊嚴菩提故。三自
他利益故。欲施施時。施已皆歡喜。名自利。饑渴者

得除名利他。四得後世大善果。謂尊貴饒財故。四
事應持戒。一自修善法滅惡戒。二莊嚴菩提攝衆
生。三卧安覺安不悔恨於諸衆生無害心。四後受
人天得涅槃樂。四事應修忍。一除不忍。二莊嚴菩
提攝衆生。三彼此離怖畏後世無瞋。眷屬不壞。不
受苦惱。四得人天涅槃樂。四事應修精進。一破懈
怠。二莊嚴菩提攝衆生。三增善法是自利。不惱他
是利他。四後得大力致菩提。四事應修禪。一破亂
心。二莊嚴菩提攝衆生。三身心寂靜是自利。不惱

法華會義十
三十一
衆生是利他。四後受清淨身。安隱得涅槃。四事應修般若。一破無明。二莊嚴菩提攝衆生。三智慧自樂是自利。能教衆生是利他。四能壞煩惱及智障是大果。如此流例。是別教明六度相也。月藏第一云。若衆生唯依讀誦求菩提。是人爲著世俗。尚不諷。已煩惱。何能調他。是人著嫉妬。名利富貴。高心自是。輕慢毀他。尚不得欲界善根。况色無色善根。况二乘菩提。况無上菩提。如星火不能乾海。口氣不能動山。萬絲不能稱岳。當知世俗不能滿菩提。

何等是第一義。謂造一切福事及修身修心。修慧以第一義熏修。則速滿六波羅蜜。若行若坐。捨攀緣。想是檀。捨攀緣。不犯是尸。於境界不生瘡。疣。是羸。不捨於離。是精進。於事中不放棄。是禪。於諸法體性無生。是般若。復次於陰捨。是檀。不計念陰。是尸。於陰無我想。是羸。於陰起怨想。是進。於陰不熾。然。是禪。於陰畢竟棄。是般若。於界捨。是檀。於界不擾濁。是尸。於界捨。因緣。是羸。於界數數捨。是進。於界不起發。是禪。於界如幻想。是般若。如是等是名

第一義諦善巧方便甚深法要。能滿六波羅蜜。以此法自爲爲他。三世菩薩悉修是法成菩提故。非世俗也。此法能息衆生煩惱道苦道。安置菩提道。又華嚴明七地菩薩念念具足十波羅蜜。當知諸地皆悉念念具足。爲存教道。故至七地說之。諸如此例。是圓教六度相也。今明釋迦因行。須知迹示四相。本行惟圓。次慈悲喜捨各有生緣。法緣無緣三種不同。三藏生緣。二乘但爲自調。止可攝入定學。菩薩爲度一切。別修四無量心。若至果成。得名

大慈大悲大喜大捨。通教法緣。二乘同修。而亦自他利別。別教次第修三。圓教一心圓具。迹四。本一例前六度可知。

三十二相八十種好。紫磨金色。十九。四無所畏。四攝法。十八。不共。神通道力。成等正覺。廣度衆生。

此次明果圓也。三十二相具在法界次第初門及法數等。文句亦略出之。茲不暇錄。三藏以精進持戒而爲相本。若不持戒。尚不能得人天。之身。况佛身相。通教以空無生爲相本。別教以道種智爲相

法華會義十一
三十
本圓教以實相爲相本。今聞法華。令我具足。卽是稱性發得。亦能迹修前三也。八十種好。十力神通等具。如法數。例須先識四教不同之相。然後結歸圓宗。
皆因提婆達多善知識故。

此結證由通經者益也。初明弟子圓因報滿竟。

①二明法師妙果當成三。初明正果成。二明所化

度。三明滅後利益。②今初。心圓具報。四本

告諸四衆。提婆達多。卻後過無量劫。當得成佛。號曰

天王如來。應供。正徧。知。明。行。足。善。逝。世。間。解。無。上。士。
調御丈夫。天人師。佛。世尊。世界各天道。

因名天熱。果名天王。國名天道。總由徹悟性德。第

一義天。非逆非順。而逆而順故也。非逆而逆。其逆

不可思議。卽逆而順。故名天熱。非順而順。其順不

可思議。統逆成順。故名天王。行於非道。通達佛道。

故名天道也。問。毘尼藏中。明調達臨入獄時。得無

根信。口稱南無。未及稱佛。身卽陷墜。佛記其三劫

罪畢。出獄爲人。當得辟支佛果。號曰南無。旣悟道

已持鉢受供。甫得食時。以宿命通自觀宿行。知是
臨終一稱南無善根之力。愧不受食。遂取滅度。與
此經授記。何頌異耶。答。諸大菩薩遊戲神通。普門
示現。三十二應具十界身。徧于法界。盡于未來。例
如央掘魔羅。薩遮尼健。迦留陀夷等事。大小兩機
所見頌異。皆由分得如來三密故也。若知此意。則
知釋尊久遠成佛。仍於大通威音等世。不行因行。
乃至今品之明求法。然燈之得受記。一一無非垂
迹。利生善權方便。殷勤稱歎方便。良有以也。

壬二明所化度

時天王佛住世二十中劫。廣爲衆生說於妙法。恒河
沙衆生得阿羅漢果。無量衆生發緣覺心。恒河沙衆
生發無上道心。得無生忍。至不退轉。

壬三明滅後利益

時天王佛般涅槃後。正法住世二十中劫。全身舍利
起七寶塔。高六十由旬。縱廣四十由旬。諸天人民。悉
以雜華末香。燒香塗香。衣服瓔珞。幢幡寶蓋。伎樂歌
頌。禮拜供養。七寶妙塔。無量衆生得阿羅漢果。無量

衆生悟辟支佛。不可思議衆生發菩提心。至不退轉。
二結會古今竟。

④三勸信

佛告諸比丘。未來世中。若有善男子善女人。聞妙法華經。提婆達多品。淨心信敬。不生疑惑者。不墮地獄。餓鬼畜生。生十方佛前。所生之處。常聞此經。若生人中。受勝妙樂。若在佛前。蓮華化生。

淨心信敬者。不于善惡之迹。妄生分別。名爲淨心。深知生生示現爲怨。正是成就作佛之大。爐鞴名之爲信。于彼爲怨爲惱之人。能起真實善知識想。名之爲敬。了達鐘以扣鳴。刀以磨利。金以鍊精。梅以寒香。但取其益。不計其非。如子食乳。不譏母醜。如人採果。不嫌枝曲。名不生疑惑。如是方是聞慧。思慧修慧。方能永離三塗。常奉諸佛。恒聞妙法。蓮華化生也。初明昔日達多通經。釋迦成道竟。

⑤二明今日文殊通經。龍女作佛。二。初明通經。二。明利益。

⑥初中五。初智積請退。二。釋尊止之。三文殊尋來。四智積問。五文殊答。

⑦庚今初

法華會義一
三十一
於時下方多寶世尊所從菩薩名曰智積。白多寶佛當還本土。

問。多寶已示入滅。何得尚有所從菩薩。答。應是彼土奉侍供養寶塔之人。能以神通願力。隨從寶塔處處聽經。亦由多寶如來神力所引攝故。

庚二釋尊止之。

釋迦牟尼佛告智積曰。善男子。且待須臾。此有菩薩名文殊師利。可與相見。論說妙法。可還本土。

智積意謂多寶佛塔。祇爲證經故出。今勸物流通。

旣訖。是故請還釋迦。則以迹門雖訖。本門未彰。故托在文殊。以畱多寶。佛之密意。非菩薩所知也。

庚三文殊尋來。

爾時文殊師利。坐千葉蓮華。大如車輪。俱來菩薩亦坐寶蓮華。從於大海娑竭羅龍宮。自然涌出。住虛空中。詣靈鷲山。從蓮華下。至於佛所。頭面敬禮二世尊足。修敬已畢。往智積所。共相慰問。卻坐一面。

問。序中文殊在座。今何自海而來。答。凡有三義。一者不起。此會於海化物。聖境隱顯。非凡所測。二者

法華會義
三十四
在序一時益訖。去時豈必白知。來時大益方生。與衆自海而至。三者梵文甚廣。傳譯甚略。彼處或具有出會之語。例如華嚴入法界品等也。問。三千之外。各有四百萬億那由他土。無復大海。文殊何故仍云海來。答。事釋未爽。况不思議。今以三義通之。一者既移天人及變大海。今神通力遠從所移處來。應無遠弊。二者海衆縱移。而龍宮不動。龍謂不動。而所居已變。從變而不變處來。有何不可。三者無緣者被徙。有緣者今來。此不思議。山海宛然。今

衆不見。但是變見。非謂改體。文殊既不起。而往其土。亦卽穢而淨。故淨名云。移置他土。都不使人有往來相。此中乃使有往來相。而本不移。故知應有機者。則土變衆移。而尚來。其無緣者。則土復衆來。而不至。所以埋雖無動。化事成規。故使所見不同。來往時異。菩薩化儀尚爾。豈佛設變同凡。問。不起而往。何故云來。答。示彼此衆。知經功力。識稟教益。故須云來。不往而往。不來而來。皆爲利物。何須此難。故知此土。雖云移去他土。未必見來。彼不見來。

法華會義一
三十五
此不見去。不來不去。而移事灼然。如淨名經中。如來足指按地。是時大衆自見坐寶蓮華。而土穢如故。

庚四智積問

智積菩薩問文殊師利。仁往龍宮所化衆生其數幾何。

庚五文殊答又四。初答利益甚多。二蒙益者集證。

三文殊結益。四智積偈讚。辛今初。

文殊師利言。其數無量。不可稱計。非口所宣。非心所

測。且待須臾。自當證知。

辛二蒙益者集證

所言未竟。無數菩薩坐寶蓮華。從海涌出。詣靈鷲山。住在虛空。此諸菩薩皆是文殊師利之所化度。具菩薩行。皆共論說六波羅蜜。本聲聞人。在虛空中說聲聞行。今皆修行大乘空義。

坐寶蓮華。無數菩薩具有二種。一者本發大心。二者本是聲聞。今蒙文殊法化。同歸一實也。大乘空義。卽諸法實相。

法華會義十一
三五五
辛 三文殊結益

文殊師利謂智積曰。於海教化。其事如是。

辛 四智積偈讚

爾時智積菩薩以偈讚曰

大智德勇健。化度無量衆。今此諸大會。及我皆已見。
演暢實相義。開闡一乘法。廣導諸衆生。令速成菩提。
初明通經竟

巳 二明利益九。初文殊自敘。二智積問。三文殊答。
四智積執別教爲疑。五龍女明圓釋疑。六身子

挾三藏權難。七龍女以一實除疑。八時衆聞見
得益。九智積身子默然信受。

庚 今初
文殊師利言。我於海中。唯常宣說妙法華經。

庚 二智積問

智積問文殊師利言。此經甚深微妙。諸經中寶。世所
希有。頗有衆生。勤加精進。修行此經。速得佛不。

庚 三文殊答

文殊師利言。有娑竭羅龍王女。年始八歲。智慧利根。
善知衆生諸根行業。得陀羅尼。諸佛所說甚深秘藏。

海華會義一
悉能受持。深入禪定了達諸法。於剎那頃發菩提心。得不退轉。辯才無礙。慈念衆生。猶如赤子。功德具足。心念口演。微妙廣大。慈悲仁讓。志意和雅。能至菩提。智慧善知衆生。總持能受佛藏。皆圓慧也。深入禪定了達諸法。卽圓定也。定慧平等。故能於剎那頃發菩提心。所謂悟無生者。方見剎那。卽是剎那際。三昧也。達此剎那。無生無性。頓入不可思議法界。所謂介爾有心。三千具足。三千卽空。得位不退。三千卽假。得行不退。三千卽中。得念不退。了知不縱。

不橫。雙照橫豎。故辯才無礙。自悟心性。與諸佛同。愍念衆生。同體在迷。故慈念猶如赤子。既能上合諸佛。下同衆生。所以功德具足。能至菩提也。心念口演四句。皆是歎其圓行。

庚 四智積。執別教爲疑。智積菩薩言。我見釋迦如來。於無量劫難行苦行。積功累德。求菩提道。未曾止息。觀三千大千世界。乃至無有如芥子許。非是菩薩捨身命處。爲衆生故。然後乃得成菩提道。不信此女於須臾頃。便成正覺。

智積侍從寶塔專證圓經。豈應不信。蓋是爲物騰疑耳。釋迦苦行。示迹同別。乃化他之權。龍女發心。卽登不退。乃自行之實。此但對偏爲權。以圓爲實也。須臾卽上文所云剎那頃也。然權實不二。事理互融。釋迦垂迹徧行難事。旣先久證圓理。龍女示現剎那發心。亦必久積資糧。况無量劫解之元卽一念。而須臾頃。性具十世古今。如瞿目仙人執善財手。于一念間備歷剎塵數劫。承事諸佛行菩薩道。理性不動。佛事灼然。若謂別教一向屬事。圓教一向屬理。則

事理分張。仍墮邊執。事非理何以自立。理非事何以自彰。願讀經者思之。

庚五龍女明圓釋疑

言論未訖。時龍王女忽現於前。頭面禮敬。卻住一面。以偈讚曰

淡達罪福相。徧照於十方。微妙淨法身。具相三十二。以八十種好。用莊嚴法身。天人所戴仰。龍神咸恭敬。一切衆生類。無不宗奉者。又聞成菩提。唯佛當證知。我闡大乘教。度脫苦衆生。

法華經義
三六
此由龍女持經得解。故矢口讚佛。卽所以明圓而釋疑也。初兩偈半。讚佛明圓。後一偈引證釋疑。初言深達罪福相徧照於十方者。罪福相。祇是十法界相。三塗爲罪。人天爲福。有漏爲罪。無漏爲福。徧空爲罪。出假爲福。二邊爲罪。中道爲福。但中爲罪。圓中爲福。旣舉十法界相。則性體乃至果報。無不全收。此十法界罪福相等。皆是因緣生法。當體卽空。卽假。卽中。三藏祇達因緣一句。照六而不照十。達則不深。照則不徧。通教祇達六界因緣。卽空達

亦不深。照亦不徧。別次第達。亦次第照。猶不得名深達徧照。唯有圓人。了知現前一念豎徹三諦之底。橫該十界之邊。無一諦而非十界。則豎非豎。無一界而非三諦。則橫非橫。非豎非橫。而橫而豎。故言深達罪福相徧照於十方也。又束此橫豎同名性德。性德非橫非豎。以諸凡聖常平等故。且說爲橫。攬性成修。須明六卽修。亦非橫非豎。以無爲法而有差別。且說爲豎。理卽在迷達而不達。照而不照。名字已去。得達照名。至究竟時。達乃最深。照乃

海華會義十
四
最徧。今讚究竟佛德。故言深達罪徧。相徧照於十方也。微妙淨法身者。三千卽假故微。三千卽中故妙。三千卽空故淨。三德不縱橫不並別。卽是諸佛所證法身。法身無相。無所不相。實相爲大小相海之本。故具三十二相八十種好。一一相好卽卽法界。本是法身所具。還用莊嚴法身。所謂全性成修。全修顯性也。天人等四句。如文可知。又聞成菩提者。牒上文殊稱讚龍女於剎那頃能至菩提也。唯佛當證知者。引佛爲證釋實積之疑問也。我闡大

乘教度脫苦衆生者。意顯不久當往南方無垢世界。成等正覺轉大法輪也。

庚 六身子挾三藏權難

時舍利弗語龍女言。汝謂不久得無上道。是事難信。所以者何。女身垢穢。非是法器。云何能得無上菩提。佛道懸曠。經無量劫勤苦積行。具修諸度。然後乃成。又女人身猶有五障。一者不得作梵天王。二者帝釋三者魔王。四者轉輪聖王。五者佛身。云何女身速得成佛。

身子於淨名經中。曾與天女問答。便已了知男女無有定相。况今初周得悟。登圓初任。已與龍女所證是同。何得實有此難。亦是爲物騰問耳。

庚七龍女以一實除疑

爾時龍女有一寶珠。價直三千大千世界。持以上佛。佛卽受之。龍女謂智積菩薩尊者舍利弗言。我獻寶珠。世尊納受。是事疾不。答言。甚疾。女言。以汝神力觀我成佛。復速於此。

寶珠。表修得圓因。上佛。表將因尅果。佛卽受之。表

獲果甚速也。觀心釋者。始覺爲寶珠。本覺爲佛。始覺合乎本覺。爲以珠上佛。佛卽受之。

當時衆會。皆見龍女。忽然之間。變成男子。具菩薩行。卽往南方無垢世界。坐寶蓮華。成正覺。三十二相。八十種好。普爲十方一切衆生演說妙法。

問。胎經云。魔梵釋女。皆不捨身。不受身。悉於現身得成佛。今乃變成男子。然後成佛。權實云何。答。胎經明現身成佛者。約自行破無明惑言也。實也。此經明變成男子者。約化他八相成道言也。權也。須

知依圓頓教而修妙行的可立地成佛。故云。法性如大海。不說有是非。凡夫賢聖人。平等無高下。唯在心垢滅。取證如反掌。由其實行甚疾。故以權行示現而證成之。令人深信不疑也。問。女變成男。卽坐道場。旣無降神。任胎出家等相。何名八相成道。答。淨穢土別。八相何必盡同。又法身示現。不可思議。此土自見。變女成男。彼土仍見。始終八相。亦奚不可。問。舍利弗等已登圓住。亦能八相作佛。何以授記猶在曠劫之後。答。自行從實。則所證理齊。化

他從權。則物機不等。况諸大弟子。並是法身應現。處處垂迹不同。安知不于他界示成佛耶。問。設使舍利弗等已於他界作佛。何必此中又示受記。答。此中受記。使物見聞。更結來緣。令于未來得度。如此橫則周徧十方。豎則番番不已。廣度衆生。衆生之界。仍不可盡。安可以情計心。測度法界大事。

○庚 八時衆見聞得益

爾時娑婆世界菩薩。聞天龍八部人。與非人。皆遙見彼龍女成佛。普爲時會人。天說法。心大歡喜。悉遙

敬禮。土無量衆生聞法解悟。得不退轉。無量衆生得受道記。無垢世界六反震動。娑婆世界三千衆生。住不退地。三千衆生發菩提心。而得受記。

先明遙見遙聞。故遙敬禮。次明彼土得益。後明此土得益。蓋南方緣熟。宜以八相作佛。此土緣薄。祇以龍女教化。皆是從體起用。普現色身三昧之力。得一身一切身。能隨宜示現也。

⑧九智積身子默然信受。
智積菩薩及舍利弗。一切衆會默然信受。

提婆達多品竟

持品第十三

二萬菩薩奉命弘經。故名持品。重勸八十萬億那由他弘經。故名勸持品。

①此迹門流通第四品也。文分爲二。初明受持。二明勸持。②初中三。初二萬菩薩奉命。此土持經。二聲聞發誓。他國流通。三諸尼請記。③今

初

爾時藥王菩薩摩訶薩。及大樂說菩薩摩訶薩。與二

法華會義 卷一
四
萬菩薩眷屬俱。皆於佛前作是誓言。惟願世尊不以爲慮。我等於佛滅後當奉持讀誦說此經典。後惡世衆生善根轉少。多增上慢。貪利供養。增不善根。遠離解脫。雖難可教化。我等當起大忍力。讀誦此經持說書寫種種供養。不惜身命。

② 二聲聞發誓他國流通

爾時衆中五百阿羅漢得受記者。白佛言。世尊。我等亦自誓願於異國土廣說此經。復有學無學八千人得受記者。從座而起。合掌向佛。作是誓言。世尊。我等

亦當於他國土廣說此經。所以者何。是娑婆國中。人多弊惡。懷增上慢。功德淺薄。瞋濁諂曲。心不實故。

問。此諸聲聞已成大士。何故不能此土弘經。答。爲引初心。始行菩薩。未能惡世苦行。通經復欲開於安樂行品也。

③ 三諸尼請記。四。初記大愛道及六千尼。二記耶輪陀羅。三諸尼領解。四諸尼發願。 ④ 今初

爾時佛姨母摩訶波闍波提比丘尼。與學無學比丘尼六千人俱。從座而起。一心合掌。瞻仰尊顏。自不暫

捨於時世尊告憍曇彌。何故憂色而視如來。汝心將無謂我不說汝名授阿耨多羅三藐三菩提記耶。憍曇彌。我先總說一切聲聞皆已授記。今欲汝知記者。將來之世當於六萬八千億諸佛法中爲大法師。及六千學無學比丘尼。俱爲法師。汝如是漸漸具菩薩道。當得作佛。號一切衆生喜見如來。應供。正徧知。明行足。善逝。世間解。無上士。調御丈夫。天人師。佛。世尊。憍曇彌。是一切衆生喜見佛及六千菩薩轉次授記。得阿耨多羅三藐三菩提。

憍曇彌亦云喬答摩。卽瞿曇也。梵音輕重耳。此翻地最勝。乃是刹利尊姓。故以呼之。

庚二記耶輸陀羅

爾時羅睺羅母耶輸陀羅比丘尼作是念。世尊於授記中獨不說我名。佛告耶輸陀羅。汝於來世百千萬億諸佛法中。修菩薩行爲大法師。漸具佛道。於善國中。當得作佛。號具足千萬光相如來。應供。正徧知。明行足。善逝。世間解。無上士。調御丈夫。天人師。佛。世尊。佛壽無量阿僧祇劫。

庚三諸尼領解

爾時摩訶波闍波提比丘尼及耶輸陀羅比丘尼并其眷屬皆大歡喜得未曾有卽於佛前而說偈言
世尊導師安隱天人我等聞記心安具足

庚四諸尼發願

諸比丘尼說是偈已白佛言世尊我等亦能於他方國廣宣此經

謙讓此土意與上聲聞同又或尼及聲聞皆是他方緣熟故也初明受持竟

戊二明勸持二初長文二偈頌 巳初中四初佛

眼視二菩薩請救三念佛默然四順佛意發誓

庚今初

爾時世尊視八十萬億那由他諸菩薩摩訶薩

眼視默勸而不告救者上來雖不別命而舉持經功德深厚引證分明多寶分身遠來勸發此之殷勤事義已足有欲應命宜卽發誓不煩復言又爲將護聲聞他方之願故不稱揚也

庚二菩薩請救

法華會義
是諸菩薩皆是阿惟越致。轉不退法輪。得諸陀羅尼。卽從座起。至於佛前。一心合掌。而作是念。若世尊告。敕我等持說此經者。當如佛教廣宣斯法。

庚三念佛默然

復作是念。佛今默然不見告敕。我當云何。

庚四順佛意發誓

時諸菩薩敬順佛意。并欲自滿本願。便於佛前作師子吼。而發誓言。世尊。我等於如來滅後。周旋往反十方世界。能令衆生書寫此經。受持讀誦。解說其義。如

法修行。正憶念。皆是佛之威力。惟願世尊。在於他方。遙見守護。

二明勸持中。初長文竟

②二偈頌。是孤起。諸菩薩等請護弘經。所以自述

弘經方軌。蓋由佛於法師品中說方軌竟寶塔。募覓用方軌人。達多引往用方軌者。釋迦卽是。稟法軌衆。故云以身爲牀坐等。今品卽是惡世。方軌安樂行。是始行方軌。故云在忍辱地等。如後廣明。若不爾者。則弘經無軌。如赤身入陣。自

損不虛。被鎧之言不徒設也。就文爲四。初明著衣弘經。二明入室弘經。三明坐座弘經。四總結請知。(庚)初中三。初總論時節以明著衣。二別明所忍之境。三明著衣意。(辛)今初卽時諸菩薩俱同發聲而說偈言

惟願不爲慮。於佛滅度後恐怖惡世中。我等當廣說。(辛)二別明所忍之境。三初通明邪人卽俗衆也。二明道門增上慢者。三明僭聖增上慢者。於中初猶可忍。第二過前。第三最甚。以後後者轉難識。

故 (壬)今初

有諸無智人。惡口罵詈等。及加刀杖者。我等皆當忍。

(壬)二明道門增上慢者

惡世中比丘。邪智心詔曲。未得謂爲得。我慢心充滿。

(壬)三明僭聖增上慢者

或有阿練若。納衣在空閑。自謂行真道。遂乃輕賤。在人

間。弘法者。彼爲貪著利養故。詐與白衣說。相似法。爲世。間

知人。所恭敬。外現威儀。猶如六通羅漢。然而是人。雖居阿懷

惡心。常念世俗。名利事。但是假名阿練若。耳彼好出我

等弘通大過而作如是謗言。此諸比丘等爲貪利養故說外道論議。自作此經典誑惑世間人爲求名聞故。分別於是經。彼常在大衆之中欲毀我等。弘法故向國王大臣婆羅門居士及餘比丘衆誹謗說我惡。謂是邪見人說外道論義。

阿練若亦阿蘭若亦阿蘭那亦阿練兒此翻無諍亦翻無喧雜處。凡居阿練若處爲調煩惱。今自舉蔑他非無諍行。故云假名阿練若也。毗尼藏中及大寶積經寶梁聚會并寶雲經佛藏經等一一廣

明阿練若行若未相應且宜尋師進道何遽守愚自是願諸行者審自思之。二別明所忍之境竟

辛三名著衣意

我等敬佛故悉忍是諸惡。雖爲斯人所輕言汝等自此經悉皆是佛。於然如此輕慢之言皆當忍受之。又濁劫惡世中多有諸恐怖惡鬼入其身罵詈毀辱我。我等敬信佛當著忍辱鎧爲說是經故忍此諸難事。我不愛身命但惜無上道。我等於來世護持佛所囑世尊自當知濁惡世比丘不知佛方便隨宜所說法惡口

而頓感。數數見擯出遠離於塔寺。如是等衆惡。念佛告救故皆當忍是事。

鎧者申也。忍辱鎧者。以能忍辱。則雖入惡世而不受傷。猶入陣有甲。不被刀箭之所害也。須知四教皆各有忍辱鎧。如中阿含經。黑齒比丘訴佛云。舍利弗罵我。說我佛。卽喚舍利弗問之。汝實罵說黑齒比丘不。舍利弗言。心不定者。或說罵。我心已定。云何說罵。如折牛角。不觸嬈人。如殘童子。恥不惱彼。我心如地水火風淨。與不淨大小便利。涕唾受

而不罵。心如掃帚。淨不淨俱掃。又如破器盛脂。置之日中。滲滲恒漏。自觀九孔常漏不淨。云何罵說於他。又如死蛇狗等繫淨童子頸。慚恥自愧。不罵說他。佛問。如是惡人。汝云何觀。舍利弗答言。人有一身善口。意不善。但念其善。不念不善。如納衣比丘見糞聚弊帛。左捉右舒。截棄不淨。而取於淨。念用其身淨。以規我身。棄其口意。以誡我口意。二口行淨。身意不淨。亦念其口。棄其身意。如熱湯者。值多草池。披草掬水。涼身止渴。三意淨。身口不淨。

亦念其意不用其身口。如行路熱渴唯牛跡少水。若用手掬水則渾濁。應兩膝跪。兩手憑地。口就吸之。以除熱渴。四三業皆不淨者。雖無可用。當痛念之。如路見病人。安置使穩。念此不淨。使得值善知識。治其三業。勿令墮落三塗。五三業皆淨。常念是人以自訓况。念齋願齊。如清涼池。多諸華草。熱渴入中以自蘇息。常念境界以去我惡。此是三藏教中。用苦無常不淨無我空爲鎧也。儒者云。見賢思齊。見不賢而內自省。又云。三人行必有我師。擇其

善者而從之。其不善者而改之。亦此義也。毗婆沙

云。念罵是一語餘皆喚聲。終日喚聲於我何爲。阿

盧奢此言罵。拘盧奢此言喚聲。我今不應念其阿字。若有阿字。是名爲罵。若無阿字。卽是喚聲。又

此方是卑陋語。他方是稱讚語。我若念此卑語。無

處得樂。此例甚多。如尸羅羸提於此未爲美辭。彼

闍殊喚於彼爲讚於此爲毀。不可枚舉。又觀此字罵。若顛倒此字。卽

成讚。如見客去。若云去早。卽名爲留。若云早去。卽

若云來早。卽是罵也。若云早來。卽是讚也。世人

執覽定有前後。共爲讚罵。妄情積聚。言聲性空。又

法華會義十
五十一
十八界中。是聲界少分。十二入中。是聲入少分。于
五陰中。是色陰少分。縱此少分。是罵其餘。非罵
又誰成就罵。罵者成就。成就自彼於我何爲。彼自
以成名句。而謂是罵。如
醜在彼面。於鏡何干。又罵是一字。一字不成罵
二字成罵。無有一時稱二字者。若稱後字。前字已
滅。又能罵所罵。一時同一剎那。俱滅於我何爲。如
是等用析空爲鎧也。又能罵所罵。皆同幻人。罵字
罵聲。皆同谷響。諦觀實我實法。了不可得。云何不
忍。此卽空爲鎧也。又凡夫不了罵空。起諸憂惱。增
長三毒。故有三塗法界。或強制安忍。故有人天法

界。聖人了罵是空。自斷結使。故有二乘法界。復于
罵者生大悲心。念拔其苦。如子狂迷而罵其母。母
常憐念。冀子病愈。故有諸佛菩薩法界。如此次第
觀察。罵中出生十界差別。不同用卽假爲鎧也。今
經明念佛告救。故皆當忍是事。佛卽佛寶告救。卽
法寶佛法不二。卽僧寶一體三寶。凡聖平等。諸佛
已悟衆生尚迷。我爲衆生翻迷歸悟。持說此經。了
知我心。上等諸佛。下等衆生。諸佛之悟。卽我心悟。
衆生之迷。卽我心迷。如此之鎧。卽慈悲室。卽法空

法華會義一
五十三
座。一鐙一切鐙乃圓教鐙也。初明著衣弘經竟

⑧二明入室弘經

諸聚落城邑其有求法者我皆到其所說佛所囑法

⑨三明坐座弘經

我是世尊使處衆無所畏我當善說法願佛安隱住

⑩四總結請知

我於世尊前諸來十方佛發如是誓言佛自知我心

持品竟

妙法蓮華經台宗會義卷四之二



廿

十一

60 1 2 3 4 5 6 7 8 9 70 1 2 3 4 5 6 7 8 9 80 1 2 3 4 5 6 7 8 9